

Rais Reko Usif Yesus

natuin nai' Markus in tuis

Nai' Yohanis Asranit anfei ranan neu Usif Yesus

1:2 Nahuun na'ko Nai' Yesus nait In mepu, Uisneno ansonu' atoin es neem nahuun. Atoni' re' naan, in kan ne nai' Yohanis. Nai' Yohanis re' ia, ro he neem nahuun, he nfei ranan neu Nai' Yesus. Mes nahuun na'ko nai' Yohanis neem, Uisneno ansonu' nahunun mafefa' es, in kan ne nai' Yesaya. Na'ko afi ahunut, nai' Yesaya antui narair, nak on ia: "Amneen, oo! Au of a'sonu' Au haef es, he nfei ranan neu Ko. **3** Haef naan of annao neu nais hu fui re' ruman, in anhunun ma ankoak nak: 'Usi' he nkoenon neem! Bifee-atonu', im he tabarab ranan ma taroitan bare! Im he taknino' ranan, ma atseun hit Usi.'" **4-6** Sin biasa anteek nai' Yohanis at nak 'Asrain Atoni". In natua anbi nais hu fui re' ruman. In paek ne anmo' je na'ko mui' tees on re' bikase', re' biasa anteket nak 'unta' in funun. Ma in na'futu' pasu. In naah sisi knamat ma niun oin hau. (Nai' Yohanis in moe' ni, nahuun on afi mafefa' nai' Elia.) Sin atokos ai' atuas na'ko kot Yerusalem, ma propinsi Yudea anfuun am nateef, sin neem na'euk nok nai' Yohanis anbi in baran. Sin neman he niit nok matak ma anneen nok sin rukik, noni'-noni' na'ko nai' Yohanis. In saksii ma natoon, nak, "Hii ro he mmanaku' are' kanan sanat, henati' Uisneno annoas naneuk sin. Narari te, ro he nasrain kii. Sranit naan anfain tanar mese' nak hii mirame' mirair hii tua mini jen mok Uisneno." Nai' Yohanis, Asrain Atoni' Ma reka' sin anneen nararin on nana te, sin manaku' sanat, oke te, sin nana'at sin tua keni neu nai' Yohanis, ma in nasrain sin anbi noe Yarden. **7** In natoon am nak onai, "Noka'-nmeu te Atoin es of he neem. In ko'u nneis na'ko kau. Au ka maso'ik kau fa, maski bait au 'rarihaa In anreka', fin au ka 'umnees 'ok Ne fa. **8** Au 'manoe ki suma au 'usrain kii paek oe, mes Atoin amneem muni' naan, of anmoe' anneis na'ko kau. In of natua ma namonib kii nok Smana Kninu'."

Nai' Yohanis nasrain Nai' Yesus

9 Oke te, Nai' Yesus neem na'ko kuan Nasaret et pah Galilea, ma nateef nok nai' Yohanis. Ma nai' Yohanis nasrain Je anbi noe Yarden. **10** Ma reka' Nai' Yesus anpoi na'ko oe, nok askeken, neno-tunan natfe'i. Oke te, Smana Kninu' na'ko Uisneno ansaun neem neu Ne, mamnita on re' kor-kefi mese'. **11** Ma hanaf Uisneno neem na'ko neno-tunan, ma nak, "Ho re' ia, Au An-neka'. Ho es re' Au 'roim ani."

Niut re'uf sin A'nak Ko'u ansoba' Usif Yesus anbi nais hu fui re' ruman

12 Narari te, Sman Uisneno neik Nai' Yesus neu nais hu fui re' ruman. **13** In natua anbi bare naan fai bo' haa ma neno bo' haa. In natua nok are' kanan kaun fui sin. Anbi bare naan, niut re'uf sin A'nak Ko'u neem ma nsoba' Usif Yesus he natuin in uaban; mes ka nabei' Je fa. Oke te, Uisneno In ameput na'ko neno-tunan neem he natuta' ma nabhae' neu Ne anbi rasi aof ma smanaf.

Usif Yesus annao on propinsi Galilea he nsaksii ma natoon Uisneno In romin

14 Anbi orses, re' sin nataam narair nai' Yohanis Asranit anbi bui, Nai' Yesus annao neu propinsi Galilea, he natoon Rais Reko na'ko Uisneno anbi naan. **15** In na'uab am nak, "Amneen, oo! Oras na'ko Uisneno he ntea jen. Orsi nhaumaken, are' bifee-atonit' fe' nahinin nak Uisneno naprenat. Hii ro he mi'piis ma mite'un hii nekam nai. Oke te mituina' Uisneno In Rais Reko!"

Usif Yesus npiir ma nbeit atoup-noni' sin

16 Anbi neen goes, Nai' Yesus annao nreuk nefo Galilea in ninin. In niit atoni' nua. Es in kanan nai' Simon, nok in orif nai' Anderias. Sin nua sin, an'okar jala he nheken ika'. Mepu naan, sin mep goe neno-neno. **17** Nai' Yesus anhaman sin am nak, "Hoe, ba'e sin! Im he mituina' Kau nai! Hii annaim ika' kii, mes anbi oras ia, Au he 'unoni' kii amfain annaim atoni' neu pukan Uisneno." **18** Ma reka' sin neen narair hanaf nana te, sin nua sin

nasaitan jala naan, ma annao natuin Ee. **19** Ma Nai' Yesus annao nkono kre'o. In niit nai' Sabadius in anhin ii orif-tataf; an-ko'u in kan ne nai' Yakobos, ma in orif, in kan ne nai' Yohanis. Sin nua sin nabarab sin pukat anbi kof es in nanan. **20** Nai' Yesus anhaman sin am nak, "Hoe, ba'e sin! Im he mituina' Kau nai!" Es nana te, sin nua sin annao nasaitan sin amaf nok in ameput sin anbi kofa' naan in tunan, ma sin natuin Ee.

Usif Yesus anriu' napoitana niut re'uf na'ko atoin es anbi kot Kapernaum

21 Ma Nai' Yesus nok tuaf haa, sin neman tean kot Kapernaum. Anbi neno naan, nateef nok atoni' Yahudi sin neon onen. Es nana te, Nai' Yesus antaam anbi uim onen ma nanoni' anbiin. **22** Are' atoni' amnokat anbi naan nsanmakan nok In uaban. Fin In na'uab saa' re' In nahiin je batur-batuur; nneis na'ko tungguru-tungguru atoni' Yahudi. **23** Anbi naan, anmui' atoin es re' niut re'uf sin naprent ee. In imsa' nok antaam anbi uim onen ma anhunun, nak, **24** "Hae! Yesus, atoni' Nasaret! Ho uum he mseor saa' mok kai? Ho uum he mureu' kai, ka? Hai mihiin Ko. Ho re' naan Atoni' re' Uisneno anba'an nani he nsonu' na'ko unu'. Ho ka mmui' fa sanat." **25** Mes Nai' Yesus naskar' ee mnak, "Kaisa' mufee! Ampoi nai mu'ko atoni' ia!" **26** Ma niut re'uf naan, anhasu' atoni' naan naheer-heer. Ma in npoi na'ko atoni' naan nok han hunun. **27** Ma are' amnemmat anbi uim onen naan, ansanmakan. Oke te, sin na'uabin, am nak, "Amoo! Sa'na antein es re' ia! Ia noin fe'u, ka? A'naefe na'uabat ro tebe! In parenat niut re'uf sin he npoin, ma sin neen ma natuin In uaban." **28** Ma bifee-atoni' sin nsaksii ma natoon mo'et na'ko Nai' Yesus, na'ko kuan neu kuan annonom nateef anbi propinsi Galilea.

Usif Yesus nareko' nai' Simon Petrus in ain babaf, ma atoni bian antein

29 Ma reka' sin npoin na'ko uim onen naan, Nai' Yesus annao neu nai' Simon ma nai' Anderias sin umi. Nai' Yakobos nok nai' Yohanis noka amsa'. **30** Nai' Simon in ain babfe anmaniin, ma antuup anbi harak. Ma reka' Nai' Yesus nok In atoup-noni' sin antaman anbi umi naan, atoin es neem ma natonan nai' Simon nak, "Ho ain baba' nmaniin." **31** Es nana te,

Nai' Yesus annao nasneko' bifee mnais amenat naan. In nnaa' in a'niman, ma anfiit nafeen ee. Ma anbi oras naan, in nareok. Bifee mnasi' naan, anpoi natuta' ma nabhae' sin. **32** Ma anbi oras mansi he nmouf, bifee-atonu' neik are' amenat sin. On nana msa', atoni' re' niut re'uf antoman sin. Sin neik amenat sin neu Nai' Yesus ma antotin ao mina'. **33** Ma are' too mfaun anbi kot naan neman ma anhaken puknok anbi umi naan in enon. **34** Bifee-atonu' pukan naan, nekin menas huma'-huma', ma Nai' Yesus nareko' sin ok-oke'. Ma In riu' napoitau niut re'uf namfau. Mes In ka nfee fa manuan neu niut re'uf sin he na'uabin, natuin sin nahiin Je.

Usif Yesus anfuun ma nateef kota-kota bian ma ansaksii Rais Reko na'ko Uisneno

35 Neis noi nmeu, re' fe' mes'okan, Nai' Yesus anfeen ma annao nasaitan umi naan. In nao neu baer ma'koro' ma ruman, ma In onen neu Uisneno. **36** Ma anbi oras nai' Simon nok in aok-bian sin anfenan, sin ka niit fa Nai' Yesus. Es nana te, sin nnao nam Je. **37** Ma anbi oras sin nateef nok Ne, sin nak, "Aam! Atonu mfaun sin naim Ko. Uum he tfain nai." **38** Ma In nataah am nak, "Reko msa'. Mes reko nneis, hit nao teu kota-kota bian anteni' re' anpaumakan. Au he 'utoon Rais Reko neu sin imsa'. Natuin Au meup uufi, es re' naan." **39** Narari te, In nao nsaksii ma natoon Rais Reko na'ko Uisneno, anbi uim onen mese'-mese', anbi propinsi Galilea nfuun am nateef. Anbi nana msa', In riu' napoitau are' kanan niut re'uf na'ko amenat sin.

Usif Yesus nareko' atoin amen nui'-atroki' mese'

40 Anbi oras nana msa', anmui' atoin amen nui'-atroki' es neem neu Nai' Yesus. In nri'tuu ma antoit ao mina' na'ko Nai' Yesus nak, "Aam! Ho mbaab kau fe'! Au 'uhiin nak Ho bisa mureko' au menas, henati' atoni' kaisa' nma'nisin anteni' kau." **41** Ma Nai' Yesus In ansao ne anmouf. Ma In nona' In a'niman ma nreo' amenat naan, ma In nak, "Tebe! Au bisa! Es nana te, Au 'ureko' ko!" **42** Nok askeken, menas naan namneuk, ma in nareok nain anbi oras re' naan. **43** Onaim, Nai' Yesus anreun atoni' naan he nfain,

ma namnaub ee nak, **44** "Amneen rek-reko, Au he 'ba'an ko! Ho murek goen, mes ka nabei' fa he mutonan sekau-sekau. Ho ro he mutuin hit na'i nai' Musa in aprenat unu'. Es nana te, ho mnao muhuun mu'ko amepu krei henati' in parikas ho aom, he in nahiin batur-batuur, ho mureko mrair, ai' ka fe'? Oke te, ho ro he meik fua'-turu' anfain tanar, nak ho mtoet makasi, hena' atoni mfaun sin nahinin, nak ho mureok batur-batuur." **45** Mes atoni naan anpoi ma nsaksii na'ko bar jes, neu bare bian. Es nana te, bifee-atoninamin he nateef nok Nai' Yesus, tar antea In ka bisa nakrira' fa In human anbi bare naan. Ma In natua anbi bare-bare ma'koro' ma ruman na' roo na'ko kot. Ma bifee-atoninamin na'ko me-mee, neem namin he nateef nok Ne.

Usif Yesus nareko' atoin men-bua' es

2:1 Neno fauk ankoon, Nai' Yesus annao nfanin nteni' anbi kot Kapernaum. Ma abitan nee, natonan anbi me-mee nak In et umi. **2** Es nana te, bifee-atoninemin na'ko me-mee. Sin nauban naan Ee tar umi naan naheun nok too. Tar antea umi naan in enon amsa' too mfaun. Anbi nanat, Nai' Yesus natonan sin Uisneno In Kabin ma Prenat. **3** Oras In fe' na'uaba te, anmuidatonin haa nroi atoin men-bua' mese'. Sin neik je neem neu Ne. **4** Mes, natuun too namfau, sin ka bisa neik fa atoninamin naan ntea Nai' Yesus In matan. Ma sin ansaen neu um je in tunan. Oke te, sin pukai umi naan in tefin, nataibon anbi Nai' Yesus In a'nakan. Ma reka' sin pukai narair um je in tefin, na' sin nasanu' amenat naan nok nain in a'nahek. **5** Ma reka' Nai' Yesus niit sin, In nahiin nak, sin pirsain batur-batuur neu Ne. Es nana te, In nak neu atoin abua' naan am nak, "Ba'e! Ho sanat sin masako' nrair." **6** Anbi naan, tungguru krei Yahudi fauk nok antokon. Oras sin neen Nai' Yesus In uaban, sin neek kein namenana. **7** Narari te, sin na'uab ein es nok es am nak, "Ai roo ma atoninamin ia, In nabrain he na'uab on re' nee joo! Suma Uisneno es na' nsaok atoninamin sin sanat. Mes atoninamin ia In uab ni on re' In es Uisneno. In nakan Uisneno es re' nee!" **8** Mes Nai' Yesus nahiin narair sin neek keni. Narari te, In nak sin am nak, "Hii kais mitenab on naan! **9-10** Mee, es ma'kafa' nneis? Karu Au 'ak 'eu atoin hae bua' ia, 'Ho sanat sin masako' nrair', hii ka mihiin fa neu he nrari oo, ai' ka? Ma karu Au 'ak 'Amfeen nai!

Mait ho 'nahek he mfain!' Karu in nfeen oras nana te, of hii na' miit ma mihiin, nak Au es re' An Mansian amneot. Fin Au 'mui' kuasat ma hak he 'saok atoni' sin sanat." Narari te, Nai' Yesus nak neu atoin abua' naan am nak, **11** "Amneen, oo! Anbi oras ia, ho mureok goen! Es nana te, amfeen nai, mait ho 'nahek ma amfain nai." **12** Ma anbi oras in neen, nok askeken in anfeen. In nuun ma nait in a'nahek, oke te anpoi nnao. Are' bifee-atonii nit nok sin matak fuan. Sin nsanmakan am nak, "Amoo! Hit fe' tiit rasi ia joo! Uisneno ro maneun teke!"

Usif Yesus anhaman nai' Lewi he natuin Ne

13 Narari te, Nai' Yesus annao nteni neu nefe Galilea in ninin. Too mfaun neman ma nateef nok Ne, ma anbi nana te, In nanoni' Uisneno In Kabin ma Prenat neu sin. Atoin ahoik roi bea **14** Anbi nana msa' nai' Lewi, nai' Alfius in an-mone. In meup ni es re' he nhoik bea he nfee neu ana aprenat Pah Roma. Reka' Nai' Yesus annao nkoon na'ko nana te, In niit nai' Lewi. Es nana te, In nak, "Ba'e! Uum he mutuin Kau!" Ma nai' Lewi anfeen am natuina' naan Je. **15** Narari te, Nai' Yesus antook ma nbukae anbi nai' Lewi in umi, nabua nok nai' Lewi in aok-bian ahoik bea sin. Anbi nana msa', atoni' bian re' atoni' Yahudi nakan sin atoin amoe' re'uf, nok nahan. Atoni mfaun na'ko atokos ma abukaet anbi re' naan, anromin he mneen Nai' Yesus. **16** Anbi oras naan, tunggur krei fauk na'ko pukan krei Farisi, sin niit Nai' Yesus antook ma anbukae nok are' ahoik bea, ma are' atoin amoe' re'uf sin. Ma sin nataan In atoup-noni' sin am nak, "Nansaa' am es hii tunggur goe naah nabua nok are' ahoik bea, ma nok are' atoin amoe' re'uf sin!" **17** Ma reka' Nai' Yesus anneen sin tanas nana te, In nataah sin am nak, "Atoin amenat sin na' namin rokat, mes atoin ao mina' sin ka namin fa rokat. Au 'uum he 'paroir atoin re'-re'uf sin. Mes Au ka 'uum fa he 'paroir are' atoni re' annaben in tuani te namneo."

Antoom rasi tanahok, ma noni'-taru' fe'u

18 Anbi orses, too na'ko pukan krei Farisi sin nanahok. Sin niit nai'

Yohanis in atoup-noni' sin nanahok amsa'. Mes sin ka nit-niit fa Nai' Yesus in atoup-noni' sin nanahok namnees on re' sin. Es nana te, atoni bian na'ko sin, neem natefan nok Nai' Yesus, ma natanan nak, "Aam! Hai minahom. Nai' Yohanis in atoup-noni' sin nanahok amsa'. Mes nansaa' am es Ho atoup-noni' sin ka nanahok fa?" **19** Ma Nai' Yesus nataah sin am nak, "Namneo, hii mihiin mirair, karu anmui' fesat kabin, taum ne sin ka nanahok fa, mes sin naah namsenan. Karu nai mon ji fe' anbi naan, sin ro he naah nabubuan. **20** Mes anbi orses, karu atoni' bian nabaak neik nai mone nana te, na' in aok-bian sin neek kein nsusan, ma sin nanahok. **21** On nana msa', ka tiit fa es he npap sii fe'u neu baru mnaa'. Natuin karu tsaef baru naan, sii fe'u naan of an'uuk gon am napolisun tamba baru mnaa' naan. **22** On nana msa', ka tiit fa es re' he narai tua min fe'u neu 'sap arapu'. Natuin 'sapa' naan of natboor, ma tua' naan of nasturun npoi oke'. Es nana te, tua min fe'u, ro he tarai je neu 'sap fe'u." (Natuina' uaba' naan, Nai' Yesus nanoni' sin am nak, In noni' fe'u, kaisa' sin seer goe nok atoni' Farisi sin noni' mnaa'.)

[Usif Yesus In atoup-noni' sin nonun maka' hum es, re' kan ne 'gandum', nateef nok Neno Snasat](#)

23 Anbi orses, nateef nok atoni' Yahudi sin neon onen, Nai' Yesus sin annaon nabnoon nok rene-rene sin ninin. Ma In atoup-noni' sin nonun mak gandum he sin nnahan. **24** Atoni' Farisi niit sin, onaim sin nak neu Nai' Yesus am nak, "Nansaa' am es Ho atoup-noni' sin antanhai hit atoran krei? Sin noun mak gandum nateef nok neno snasat! Ka nabei' fa, he him moe' on naan!" Mak gandum **25-26** In nataah am nak, "He tak on mee jo? Hii ka mimnau fa reta' na'ko Na'i nai' Daud. Anbi oras naan, Atoni mnasi' nai' Abiatar anrair 'Nak Ko'u neu are' ameput krei Yahudi. Na'i nai' Daud nok atoni-atoni' re' natuina', namnahan maten ma sin tai kein na'keor ein. Onaim sin taman anbi Uisneno In Tenas Onen, ma nait utunu' re' na'fuat sin ma nana'at naraar je neu Uisneno, ma sin nnahan. Mes in amneon ii suma ameput krei Yahudi sin es bisa nnahan, ma 'teta' na'ko nanat ka bisa fa. Onai ma Na'i nai' Daud sin nahan, mes ka tiit fa es nakaina' sin." **27** Oke te,

Nai' Yesus natonan teni' sin am nak, "Nati' kaisa' mnikan, nak Uisneno napara' neno snasat neu hit mansian. Mes In ka nmoe' fa mansiani arahaa he natuin atoran na'ko neno snasat. **28** Fin Au re' ia, An Mansian Amneot. Au msa' a'mui' hak he 'reek mansian, he nmeup sa'-saa' anbi neno snasat. Ma Au msa' a'mui' hak he 'penan mansian, he kaisa' nmeup sa'-saa' anbi neno snasat."

Usif Yesus nareko' atoin amenat nateef neno snasat

3:1 Narari te, Nai' Yesus anfanin teni' anbi uim onen. Anbi naan, In niit atoin es re' in a'niman bian anmaet na'ko oras ahunut. **2** Anbi nana msa', anmui' atoni' bian re' namin ranan piut-piut, he nasaan Nai' Yesus. Es nana te, sin maat Ne, he nahinin, nak In nareko' atoin amenat nok neno snasat ta'oo, ai' kah. **3** Oke te, Nai' Yesus no'en atoni' re' in a'niman bian anmaet naan, ma nak, "Ba'e! Au 'uskau ko, uum he mhaek mu matan ia." **4** Oke te, In nataan sin ok-oke', nak, "Karu tatuina' hit harat rasi pirsait, sa'na' es re' nabei' he hit mo' je anbi neno snasat? He tareko a'oo, ai' tareu'? He tareko atoin amenat ta'oo, ai' he troor tisan?" Mes sin ka ntonin fa sa'-saa'. **5** Es nana te, Nai' Yesus In neek ne ansuus anmaet, natuin sin nape' sin roen keni, neu he nparoir sin harat nneis na'ko he nparoir atoni' 'nim amates naan. Ma In natoo', es nana te, In na'kena' In matan neu sin. Oke te, In nak atoni' naan, nak, "Ba'e! Amnona' ho 'nimam naan neem!" Ma atoni' naan annona' in a'niman, ma nok askeken, in a'niman nareok. **6** Narari te, atoni' pukan krei Farisi anpoi nasaitan uim onen naan. Ma sin annao nateef nok atoni' na'ko parte-purtik Herodes, ma sin bu'-bua' namin ranan he na'maet Nai' Yesus.

Usif Yesus nareko' atoni mfaun anbi nefo Galilea in ninin

7-8 Anbi orses, Nai' Yesus nok In atoup-noni' sin annaon he nas-nasan akre'o anbi nefo Galilea in ninin. Mes natuin atoni mfaun sin anneen saa' re' In anmoe' narari, es nana te, atoni' na'ko kuan-kuan neem natuin Ee. Sin neman na'ko propinsi Galilea, ma Yudea, ma Idumea. Ma bian anteni'

neman na'ko kot Yerusalem, ma Sidon, ma Tirus. Ma bian anteni' neman na'ko noe Yarden in panin et neon-saet. Sin ar sin namin ranan he nateef nok Ne. **9** Nai' Yesus anreek atoup-noni' sin he naim nee kof es, natuin atoni' amnemat sin namfaun. In roim he na'uaba' anbi kof'e in tunan, henati' mamnita' ma sin neen In hanan. **10** Nahunu te, In nareko' niit amenat namfau, tar antea anbi oras re' naan, amenat bian sin anmabe'un he nreo' naan Je. **11** Ma reka' atoni'-atoni' re' napein niut re'uf sin niit Ee, sin tof-nook anbi Nai' Yesus In matan. Ma sin anhunun, nak, "Ho re' ia, Uisneno In Anah!" **12** Mes In ntaar sin batur-batuur, nak, "Nati' kaisa' mitonan sekau-sekau sa'-saa' antoom neu Kau!"

Usif Yesus nruur ma nreek atoup-noni' bo'es am nua

13 Narari te, Nai' Yesus ansae anbi to'ef es in tunan. In no'en naan atoni' fauk re' nmatoom nok In nekan. Onaim, sin neem natuin Ee. **14** Es nana te, In nruur ma nreek naan atoni' bo'es am nua. In nak sin am nak, "Au 'ruur kii he hii mituina' Kau piut-piut. Au msa' of a'reek kii he mnao mitoon Rais Reko Uisneno neu mansian. **15** Ma Au of a'fee kii kuasat ma'tani', he hii mriu' niut re'uf na'ko mansian." **16-19** Atoup-noni' bo'es am nua naan, es re': nai' Simon (re' Nai' Yesus anteket nak, nai' Petrus), nai' Yakobos, nok in orif nai' Yohanis, (nua sin, nai' Sabadius in anhiin. Nai' Yesus anteek nanesa' sin nua sin, nak 'Boanerges', re' neik hit uabit nak "root se na' punu".) nai' Anderias, nai' Felipus, nai' Bertolomeos, nai' Mateos, nai' Tomas, nai' Yakobos (nai' Alfius an-mone), nai' Tadius, nai' Simon (atoni' na'ko parte-purtik Selot), ma nai' Yudas Iskariut (re' of he na'sosa' Nai' Yesus).

Tunggur agama sin nasaan Usif Yesus nak niut re'uf sin A'nak Ko'u es re' anfee kuasat neu Ne

20 Narari te, Nai' Yesus nok In atoup-noni' sin nsanun fanin na'ko 'to'ef naan. Ma sin antaman anbi umi. Too mfaun neem nauban anteni Ne. Es nana te, sin ka napenin fa manuan he nbukaen. **21** Nkius Nai' Yesus on

nana te, bian na'uab ein nak, "Mkius miit Nai' Yesus. In nika' nain In tuan, ma ka maparori' fa." In ba'asar sin anneen uaba' naan, es nana te, sin neman he nok nafani Ne. **22** Oras naan, tungguru krei fauk na'kon kot Yerusalem, neman ma natonan abitan re' naan nak am nak, "Hoe! Hii kais mituina' Nai' Yesus. Natuin niut re'uf sin A'nak Ko'u, re' anteket nak Baalsebul, antaam anrair et Ne, ma nfee Ne kuasat he nriu' niut re'uf sin." **23** Ma reka' Nai' Yesus anneen ate, In anhaman nabuaba' sin am nak, "Ia ka ntaam fa neu ronef! Nok ranan mee, niut re'uf sin A'nak Ko'u bisa nriu' nafani in tuan! **24** Karu anbi prenat pah es, in too goe nmatoe ma nmaban piut, nok ranan mee henati' prenat pah naan anhaek na'bei? **25** Ma karu anbi um jes in nanan, sin es ate nmanau nok es, nok ranan mee ka, henati' sin fanin mese'? **26** On nana msa', karu niut re'uf sin anmamusun es nok es, tebes sin of anbait-sok. Karu nrair on nana te, sin namre'un maten. **27** Karu atoin es he neem nabaak ai' nasiik bare' anbi atoin ma'tani' es in umi, in ro he nfuut naheran nahunun atoin ma'tani' naan. Oke te, in na' napein manuan he nait atoni naan in bare'. **28** Onaim Au 'utoon ain kii: Uisneno nabarab ma anpao he naneuk bifee-atoni' sin sanat. On nana msa', neu sekau-sekau re' na'uab na're'uf es, Uisneno fe' anfee saok sanat neu ne. **29** Mes karu sekau-sekau na'uab na're'uf Uisneno In Smana Kninu', Uisneno ka nsaok fa in sanat, tar antea nabar-baar!" **30** Nai' Yesus na'uab on naan, natuin sin nak Ne mnak, "Niut re'uf antaam Ne jen!"

Usif Yesus In nonot-ba'asar amneot sin

31 Narari te, Nai' Yesus In ainaf nok In orif sin neman neu umi naan, he natefan nok Ne. Sin nhaken anbi mone' ma anreek he no'en Ne. **32** Anbi oras naan, Nai' Yesus antook ma na'uaba' nok too mfaun. Ma sin neem natoon Ne nak, "Aam! Ho aina' nok ho ori' sin, feto-mone, etan mone'. Sin he natefan nok Ko, Aam." **33** Mes Nai' Yesus nataah neik hantanas mese' nak, "Au aina' ma Au ori'-tata' amneot, es re' mee, ka?" **34** In ankius too re' antokon mniuk naan Ne. Ma In na'uaba' nak, "Hii arki ok-oke amfani Au aina' ma Au ori'-tata' amneot. **35** Fin, sekau-sekau re' natuin Uisneno In romin, sin anfani Au nonot-ba'asar amneot."

Usif Yesus nareta' antoom fini anbi afu huma'-huma'

4:1 Anbi orses, Nai' Yesus annao nteni neu nefo Galilea. Ma too mfaun neman ma naub Ne. Anmui' kof es anhaek anbi naan. Es nana te, In ansae ma antook anbi kofa' naan in tunan, ma nanoni' sin. Too mfaun anbi nefo naan in ninin, anneen In uaban. **2** Ma In nanoni' sin antoom rasi namfau neik reta' nak, **3** "Hii mneen rek-reko! Akani' fini es annao ma nkani' fini anbi in rene. **4** Oras in nkani' fini te, bian anmofun anbi ranan. Es nana te, koro-koro neman ma ansinu' nain fini-fini naan. **5** Ma fini bian anmofun anbi fatu re' in af goe manihias. Fini naan natoor raba. Mes natuin afu naan manihias, **6** es nana te, oras manse nsae, fin atoros naan anmak-nene' ma nmaet. Natuin sin a'ba' keni ka ntaman ntean fa af goe in a'pinan. **7** Fini bian anteni' nmofun anbi huu ma'aika'. Es nana te, huu ma'aika' naan, anneo niis fini naan, tar antea ka bisa napuin fa. **8** Ma fini bian anmofun ntom auf afa'. Fini naan natoor, narari te na'nae tar napuin. Fini bian nasuuf no bo' teun, bian no bo' nee, ma bian no naut nes. **9** Sekau es anneen ma anheek naan reta' ia in a'mofun, maut he natenbe mnaon kon."

Nansa'at es Usif Yesus nanoni' te anpaek reta'?

10 Anbi orses, Nai' Yesus anmes-mees. Oke te, In atoup-noni' sin bo'es am nua, nok atoni' bian anteni' re' anneen niit In reta' naan, neman he nateef nok Ne. Sin antotin henati' In natonan sin reta' naan in a'mofun. **11** Nai' Yesus nataah sin am nak, "Natuin hii mroim he mihiin namneo-namneo Uisneno In Aprenat, es nana te, Au 'utoon kii reta' naan in a'mofun. Mes neu atoni' bian, Au 'unoni' sin nok rais reta'. **12** Atoni' bian sin anfanin on re' Uisneno In mafefa' antui nani nak, 'Sin nitan nrarin, mes ka nromin he nheek fa 'mofun. Sin nenan nrarin, mes sin on fe' ka nahinin fa. Maut he sin kaisa' npirsai Uisneno, henati' Uisneno kaisa' anfeen sin saok sanat antein.'"

Usif Yesus natoon reta' antoom fini naan in a'mofun

13 Narari te, Nai' Yesus natonan sin reta' naan in a'mofun nak, "Karu hii ka mheek fa rais reta' ia in a'mofun, nok ranan mee, henati' hii mheek reta'

bian sin a'mofun? **14** Onaim in a'moufn ii on ia. Akani' fini naan, es re' sin re' nsaksii ma natoon Uisneno In Kabin ma Prenat. **15** Fini re' anmofun anbi ranan, tar antea koro-koro ansiun nain sin, es re' sin re' anneen Uisneno In Kabin ma Prenat. Mes fe' ka 'roo fa te, niut re'uf sin A'nak Ko'u neem ma nasiik naan Kabin ma Prenat naan na'ko sin nekak. **16** Fini re' anmofun antoom fatu, es re' sin re' anneen ma antoup nok marinit a'naek. **17** Mes Kabin ma Prenat naan ka na'baa' fa. Es nana te, in ka ntahan fa 'roo anbi sin nekan. Ma reka' atoni' bian nasusab sin, natuin sin antoup Kabin ma Prenat naan, sin nporen nain Kabin ma Prenat re' naan. **18** Fini re' anmofun nbi huu aika' in a'tnanan, es re' sin re' anneen narair Kabin ma Prenat naan. **19** Mes sin ntaisibun manenu' nok rasi huma'-huma', henati' sin nhariin sin tua keni. Es nana te, taisibu huma'-huma' naan, es ansiu' napoitana Kabin ma Prenat naan na'ko sin nekan, tar Kabin ma Prenat naan ka nafua fa sa'-saa'. **20** Ma fini re' anmofun neu auf afa', es re' sin re' anneen ma antoup Kabin ma Prenat naan, ma natuin Usi' In romin. Narari te, sin moe' mo'et-mo'et arekot, on re' fini re' nafua. Mo'et bian nasuuf no bo' teun, bian no bo' nee, ma bian no naut nes."

[Kaisa' amtoeb paku meki 'kora'](#)

21 Nai' Yesus na'uab piut na'ko kofe in tunan. In nfee nteni' reta' mese nak, "On mee! Hii mit-mita ai' kah, karu atoni' nout pauk ana', oke te antoob je anbi 'kor' es in nanan! Ai' natuun'e anbi har'ke in nupun. Ka tiit fa fe', oo? Karu natuun'e anbi naan, in ka npiin fa heen. Atoni ro he natunu' paku anbi bare' ratan he npiin. **22** Es nana te, rasi re' nahunut ma'koro', of mamnita'. Ma saa' re' oras ia ka mahini' fa, of mahini'. **23** Sekau es anneen ma anheek naan reta' ia in a'mofun, maut he natenbe nnaon kon." **24** Narari te, In na'uab anteni, "Mitenab rek-reko! Karu hii m'ukur atoni' in a'mo'en, atoni' bian of an'ukur kii on naan. Uisneno amsa' of an'ukur kii nneis na'ko naan. **25** Karu sekau he naim Uisneno In romin batur-batuur te, in of nahinin nkoon. Mes karu sekau re' ka nfiroir fa Usi' In romin, in of anmonon nkoon."

Reta' antoom fini re' anmoin kun

26 Narari te, Nai' Yesus na'uab anteni' nak, "Uisneno In Aprenti anhanua-ntein on, on re' fini re' mapone' anbi atoni' in rene. **27** Maski atoni' naan anfain neu in umi, ma fai-manas in antuup ma anfeen, in nikan nain fini naan. Mes fini naan natoor ma na'nae piut. **28** Fini naan anmoin kun anbi afu, anmurai na'nae, nasuuf, ma napuin. **29** Karu mak'e namnatu te, in tuan ne suma neem he nreif jah. Uisneno In Aprenti msa' on naan. Are' sa'-saa' Uisneno es anmepu."

Reta' antoom fini re' ana' krisi'

30 Narari te, Nai' Yesus na'uaba' anteni' nak, "Au 'fee teni' kii ret es on ia. Hii bisa minesa' pukan Uisneno. Un-unu' te sin fu'-fua'an, mes na'ko neno neu neno, sin ntamba mfau re'uf. **31** Namnees on re' fini re' ana' krisi'. **32** Karu hit seen fua musi' naan, in na'nae anfain hau ko' re'uf. Tar antea, koro-koro neman ma namin mafo' anbi naan, fin anmo'en kuna'." **33** Nai' Yesus nanoni' sin on naan, namnees nok sin hinet. **34** In biasa npaek reta' karu In nanoni' atoni' bian sin. Mes karu In nok In atoup-noni' sin, In natoon are' reta' naan sin a'mofun.

Usif Yesus nas-nasab ain ko'u

35 Mansi nmaeb jen, mes Nai' Yesus fe' anbi kof'e in tunan. Ma In reun In atoup-noni' sin am nak, "Im ar kit traak on nef goe bian." **36** Oke te, sin nsaen kofa' bu'-bua' nok Nai' Yesus. Ma sin nmao nasaitan too mfaun anbi naan. Mes bian ansae nok kofa' teta'. **37-38** Oras naan Nai' Yesus antao In a'nakan anbi aka'nunu' ma antupa nfin anbi kof'e in kotin. Sin annaon ka 'roo fa te, ain ko' goe neem. Ma okin anpesan, ma oe antaam anbi Nai' Yesus sin kofa', tar antea ara kre'o te naheun. Es nana te, atoup-noni' sin namtau nmaten. Ma sin neem nafeen Ee nak, "Amoo! Amfeen fe'! Hit he tremat-maet! Mes Ho ka mfiroir fa!" **39** Ma Nai' Yesus anfeen ma ntaar anin, ma In naprenat okin naan nak, "Musnaas nai! Mu'tena' nai!" Ma anbi oras naan, anin nasnaas, ma okin na'tena'. **40** Narari te, Nai' Yesus

nfai-neek neu In atoup-noni' sin am nak, "Nansaa' am es hii mimtau baiseke' on naan? Hii ka nmui' fa rasi fnekat neu Kau, ka?" **41** Sin ar sin namtaun ma nsanmakan. Ma sin na'uabin am nak, "Sekau on re' In? Tar antea anin ma okin sin natuina' In aprenat!"

Usif Yesus nareko' atoni' re' niut re'uf namfau ansae ne

5:1 Narari te, Nai' Yesus nok In atoup-noni' sin antean nefo Galilea in panin, anbi bar jes re' anteket nak Gerasa. **2-6** Anbi naan, nahunu te niut re'uf sin ansaen atoin es ma in namaun. In natua et niut naet ein. Fai-manas in na'oin neum neem nok ao afa' nkoon anbi are knete' ma 'nonof sin, ma anhunun ka natfekaf. In ntuut napapa' in aon neik fatu. In ma'taenni ka heen. Ka tiit fa es re' bisa nfutu, maski neik korenit. Sin anfuut niit in haen ma in niman neik korenit, mes in nafeek korenit naan, ma in na'iup nit-bese naan na'ko in haen. In ro ma'tain bese tar antea ka tiit fa tuaf es amsa' re' bisa ntaah ne. Atoin amaunut Oras Nai' Yesus sin ansanun na'kon kofa', amaunut naan niit sin na'ko 'roo. In npoe na'ko niut nate' sin, in naen neem ma nri'tuu anbi Nai' Yesus In matan. **7-8** Reka' Nai' Yesus niit atoni naan, In nak, "Hoi! Niut re'uf! Ampoi nai mu'ko atoni ia!" Narari te, atoni naan anhunun nak, "Hoi! Ho he munsaa' kau? Au 'uhiin 'ak Ho re' ia Nai' Yesus, Uisneno Akuasat In Anah. Au 'toit Ko henati' Ho kaisa' mha'mui' kau jo!" **9** Ma Nai' Yesus nataan ee mnak, "Ho kanmi sekau?" In nataah am nak, "Au kanki nai' Legion , natuin hai mfau re'uf, on re' sorarus batalyon-batalyon sin!" **10** Niut re'uf sin anpaek atoni' naan he ntoit Nai' Yesus henati' kaisa' nreun sin he npoin na'ko bare naan. **11** Anhaumak bare naan atoni' fauk antiut fafi o'f es. Anbi naan fafi ok-oke' oni' nifun nua. Sin namin mnahat anbin to'ef sin abnap kein. **12** Narari te, niut re'uf sin antoit Nai' Yesus nak, "Amreun kai he hai mnao mtam meu faif nee." **13** Nai' Yesus antoup sin han totis naan. Es nana te, are' nitu-nitu sin anpoin ma antaman neu fafi-fafi naan. Fafi pukan naan, naen ansiksak nok, ma nasroro nsanun na'ko kefa-mnanu' neu nif goe in nanan. Ma sin nrem anmaten. **14** Ma oras are' atuuk fafi sin nitan on naan, sin arsin namtaun maten. Sin naen anfuun ma nateef kuan-kuan ma natonan are' too mfaun. Es nana te, too mfaun sin

anpoi neman he nkius saa' re' anrari nbi naan. **15** Sin neem nateef nok Nai' Yesus, ma sin niit atoin amaunut antook anbi naan. In nareko nrair, ma in anpaek tais. Ma reka' sin niit rasi naan sin arsin namtaun, fin sin nahinin nak sekau es anriu' napoitan niut re'uf na'ko atoni' naan, in ro atoin ma'tani'. **16** Narari te, sin arsin anmaktoon nein nak sin niit nok sin matak atoin amaunut naan nareok, ma fafi-fafi sin anreman maten. **17** Oke te, sin ntotin nok ma'tani' henati' Nai' Yesus annao nasaitan sin pah. **18** Ma reka' Nai' Yesus ansae nfain neu kofa' on nana te, atoin arekot naan neem ma antoit he nnao nabua nok Nai' Yesus. **19** Mes Nai' Yesus anpeen. In nak neu atoni' naan, "Reko nneis ho mfain nai on ho umi, ma ho nonot-asar sin. Mutonan sin are' kanan rasi re' Uisneno nmo'e nrari neu ko. Mutonan sin mak Uisneno nneek niis ko!" **20** Narari te, atoni' naan annao ma natoon na'ko kot neu kot nasoup kot bo'es, re' anteket nak 'Dekapolis'. In nsaksii ma natoon are' kanan rasi re' Nai' Yesus anmoe' narari neu ne. Ma sin arsin re' anneen uaba' naan ansanmakan ma na'uabin nak, "Ro batur, ooo!"

[Usif Yesus namonib nafani' nai' Yairus in an-feto. Biffee ameen na' anreo'](#)
[Usif Yesus In baru](#)

mnanu' **21** Narari te, Nai' Yesus sin ansaen kofa' ma anraak anfanin on nefe in panin. Oras sin ansanun na'ko kofa', too mfaun sin neman ma nauban naan Je. **22** Anbi kot naan, anmui' naan atoin es in kanan nai' Yairus. In es a'nakat anbi uim onen kot naan. Oras in niit Nai' Yesus, in anri'tuu anbi Nai' Yesus In matan, **23** ma antoit nak, "Koi, au Ama! Au an fet goe fe' toon bo'esam nua. In nameen ma nhaumak he nmaet jen. Aam! Ho mkoenom meu nai he mturun mureko' man au anah!" **24** Ma fin Nai' Yesus nok nai' Yairus annaon neu in umi. Ma oras sin annaon on nana te, too mfaun sin nokan ma anbeu' Goe. **25** Anbi too mfaun naan, anmui' biffee es re' napein funan ka natfeek fa oni toon bo'es am nua goen. **26** In narair roit nok are' kanan in a'mu'in sin natuina' anbaena' rokat. Mes ka tiit fa es nareko' in menas. In naa ii ka nheut niit fa, tar in mensi ma'fena'. **27-29** Biffee naan anneen fani-fani antoom Nai' Yesus. Es nana te, in anbeo' are' too mfaun naan, ma anhaumak-maak Nai' Yesus kotin. In natenab nak, "Asar au 'reo'

an In baru mnanu', au of 'ureok." Ma anbi oras in nreo' Nai' Yesus In baru, nok askeekn ate, na' naan anheut. In naben ate in nareok. **30** Anbi oras nana msa', Nai' Yesus annaben ate anmui' nenuf re' anpoi na'ko In tuan. Es nana te, In nik-koit ma ankius neu atoni mfaun sin. Narari te, In nataan am nak, "Sekau es anreo' Au baru mnanu' ia?" **31** In atoup-noni' sin natahan am nak, "Aam! Ho mkius kum. Te na' atoni mfaun sin anmabe'un es nok es ate. Oke te Ho mutanam mak, 'Sekau es anreo' Au baru mnanu'?" **32** Ma Nai' Yesus ankius sin mese-mese he naim tuaf re' anreo' In baru mnanu' naan. **33** Anbi oras Nai' Yesus nataan on nana te, bifee re' naan namtau-nmaet. Narari te, in anri'tuu anbi Nai' Yesus In matan, ma anmanaku' nak, "Koi, Aam! Au es a'reo' ho baru mnanu' naan." **34** Ma Nai' Yesus antoin bifee naan nak, "Ain! Natuin ho nekam na'teeb batur neu Kau, es nana te ho mureok. Ho mfain nai nok marinat." **35** Ma oras Nai' Yesus fe' na'uaba' on nana te, atoni' neman na'ko nai' Yairus in umi natoon am nak, "Eee, kasian! An fetu naan anmaten nrair. Kaisa' muhaeba' Uis tungguru ntein!" **36** Mes Nai' Yesus ka nfiroir fa atoni' naan in uaban. Onaim In nak neu nai' Yairus nak, "Ho kaisa' mumtau! Mpirsai nai meu Usi!" **37** Ma Nai' Yesus annao nasaitan In atoup-noni' bian. In noka haa nai' Petrus, nai' Yakobos ma in orif nai' Yohanis. **38** Ma reka' sin neem antean nai' Yairus in umi, sin niit too mfaun antaisibun maten, ankaen, ma anhuun nein. **39** Nai' Yesus antaam anbi umi naan. In nataan sin am nak, "Te nansaa' am es hii mkae mi' sek-seke' on re' ia? In ka nmatef. In suma ntuup." **40** Reka' sin neen Nai' Yesus na'uab on nana te, sin nmanin nfaer Ee. Narari te, In anreun napoitan sin ok-oke'. In no'en ri'ana' naan in amaf ma in ainaf, ma nok atoup-noni' teun, sin arsin antaman anbi ri'ana' naan in ke'en. **41** Ma Nai' Yesus anna' ri'ana' naan in a'niman, oke te In npaek sin uaba nak, "Talita kum! " Re' neik hit uabi te nak, "An fetu! Amfeen nai!" **42-43** Nok askeken, ri'an fetu naan anfeen ma annao. Nai' Yesus anreek an-fetu naan in ainaf nak, "Amfee ne he naah!" Are' bifee-atonu re' niit rasi naan ansanmakan. Mes Nai' Yesus antaar sin nok ma'tani' nak, "Kaisa' mitonan es-es mak Au 'umonib 'ufani' an-feot amates ia!"

[Abitan Nasaret anpenan Usif Yesus](#)

6:1 Narari te, Nai' Yesus nok In atoup-noni' sin naon nfanin neu In kuan Nasaret. **2** Nateef nok atoni' Yahudi sin neon onen, Nai' Yesus antaam anbi uim onen he nanoni'. Anbi neno naan too mfaun neman he n'oen nein. Ma reka' sin arsin anneen In nonin te, sin sanmakan ma na'uaban nak, "Atoni ia mahiin ni ma'tani"! In imsa' anmui' kuasat ate! Nok ranan meem es In on re' nee? **3** Mneoni In suma bukan hau. Hit tahiin In ainaf Bi Maria; nok are' In orif sin, es re': nai' Yakobos, nai' Yoses, nai' Yudas nok nai' Simon. Ini msa' anmui' fetof. Hit arkit tatua kuan mese!" Sin ka nmenan tein ee fa, natuin sin mu'in nek mantinus. **4** Es nana te, Nai' Yesus nak neu sin nak, "Namneo! Atoni' anhormat mafefa' Uisneno re' anao-amnemat, anneis na'ko mafefa' kua-tuaf." **5-6a** Atoni mfaun sin neek manun baiseke', tar sin ka npirsai nteni' fa Nai' Yesus. Es nana te, In sanmaak. Tar antea, In ka nmo'e nteni' fa rasi mkakat anbi naan. In suma areo' nareko' nanahaa amenat fau ka.

Usif Yesus anfee mepu neu In atoup-noni' sin bo'es am nua

6b Oke te, Nai' Yesus annao neu kuan-kuan nfuun ma nateef, ma nanoni' sin Uisneno In romin. **7** In no'en atoup-noni' sin bo'es am nua, ma anreun sin tuaf nu-nua, he nnaon ma natoon Rais Reko Uisneno. In imsa' anfee kuasat neu sin he nri'un niut re'uf. **8-9** In anba'an sin nak, "Kaisa' meik brua' namfau anbi ranan. Kaisa' meik beti', kaisa' meik noni-roit, ma kapi'. Hi meki ha teas, pein haef, ma baru mese'. **10** Karu sekau antoup kii he mtaam meu in umi, mimaika' ambi naan tar antea hii mnao mkoon meu bare bian. **11** Mes karu anbi bare mee sin ka ntoup ki fa, ma sin ka natniin ki fa, ampoi mi'ko bare naan. Ma mitonan sin am mak, "Natuin hii ka mroim he mitniin fa, es nana te maut he hii msutai in amre'un!" **12** Narari te, sin nnaon ma natoon Rais Reko naan. Sin nak neu tuaf-tuaf sin henati' anmonin natuin ranan Uisneno. **13** Ma sin anriu' napoitani niut re'uf namfau. On nana msa', sin anhose' mina' neu atoin amenat sin a'nakan, ma an'onen nareko' sin. Ma fin sin narekon.

Sin na'maet nai' Yohanis Asranit

14 Eti naan, atoni' et are' bare-bare nahiin Nai' Yesus. Tar antea Usif Herodes amsa' anneen anrair Nai' Yesus In mepun. Anmui' tuaf bian nak, "Nai' Yohanis Asranit anmoni nfain et Nai' Yesus In aon-ta'un! Es na' In nabei' he nmoe' are' kanan rasi sanmakat namfau." **15** Mes atoni' bian nak, "Kahaf! Ia mafefa' kninu' nai' Elia es anmoni nfain anbi In aon. Ai kah ate, tuaf es na'ko mafefa' kninu' Uisneno ahun-hunut sin." **16** Ma reka' Usif Herodes anneen rasi nana te, in nak, "Ia nai' Yohanis Asranit re' afi ahunut au 'reek ma an'oet nafeek in a'nakan. Oras ia in anmoin anfain jen." **17-18** Usif Herodes anreun on naan, natuin in mui' rais ko'u es nok nai' Yohanis. Rasi naan on ia: Usif nai' Herodes nasiik naan in orif nai' Felipus in fee, in kanne bi Herodias. Maski nai' Felipus nok bi Herodias ka nman poir niin fa fe'. Natuin rasi naan am es, nai' Yohanis nakain ee fani-fani nak, "Aam Usi! Ka nabei' fa he ho mait ho ori' in fee. Natuin rasi naan ansaan na'ko harat atoni' Yahudi." Mes nai' Herodes in sao ru'-ru'. Ma in nreek tuaf he nheek nai' Yohanis ma nataam ee neu hukun. **19** Natuin fani-fani nai' Yohanis nakaina' on naan, etun bifee naan natenab nek to'os he nroor niis ne. Mes in fe' ka napein fa manuan, tar antea nai' Herodes nataam nai' Yohanis anbi hukun, **20** ma anreek sorarus sin he npante rek-reko. Namneo nai' Herodes anmanu'hain nai' Yohanis. In nahiin nak Uisneno es ansonu' nai' Yohanis. Ma nai' Yohanis naan atoin reko. Nai' Herodes anroim he mneen nai' Yohanis in uaban. Mes neot es-neot es ate, in npenan nai' Yohanis in uaban. **21** Namuni te, fenai Herodias napein manuan he nateaba' in nek menas naan. Oras naan, sin fesat nai' Herodes in neon mahonin. Sin naskau a'naet sin he nokan bukaen anbi fesat naan. Amnokat sin es re' ana' aprenat, a'nak sorarus sin, ma mnasi-mnasi' pah Galilea. **22** Oras festi ntainua goen, fenai Herodias in an fet goe antaam neem ma nabsoo'. In absoo' ni reok ni kaheen, tar antea nmoe' Usif Herodes nok are' amnok fesat naan anmariin anmaten. Es nana te, Nai' Herodes no'en abso'ot naan ma nak neu ne nak, "Ho mroim he mtoit saa' na'ko kau te, mutoon! Au ro he 'fee ko. **23** Maski ho mtoit tar antea nbait nua au prenti amsa', au ro he 'fee ko goe. Au 'suup 'eik Uisneno In kanan!" **24** Ri' an-feto naan annao ma nataan in ainaf nak, "Ain! Ho mroim he au toit sa'na re' reko nneis na'ko ama?" Ma in ain fe nataah ee nak, "Hau, oo! Reko! Mnao nai ma mtoit man nai' Yohanis in

a'nakan." **25** Narari te, an-feto naan neem neu nai' Herodes in matan am nak, "Amo! Au toit henati' amfee kau nai' Yohanis in a'nakan, amtao man je anbi dulang es. Rabah!" **26** Ma reka' nai' Herodes anneen han totis naan, in nekni namneuk. In ka nabei' fa he nheer nafani' in han supat, natuina' are' too mfaun sin anneen narair han supat naan. **27** Narari te, in naprenat naan a'nak sorarus es ma nnao n'oet neik nai' Yohanis in a'nakan naan na'ko uim hukun. **28** Ma sin an'oet naan nai' Yohanis in a'nakan, ma ntao naan je anbi dulang es. Oke te, annao naat ee neu ri' feto naan. Ri' feto naan ntoup dulang, ma nnao nfee je neu in ainaf. **29** Anbi eti nai' Yohanis in atoup-noni' sin annenan nak, an'oet narair nai' Yohanis in a'nakan, sin neman ma nait neik nai' Yohanis in aon ma annao nsuub ee. Rais reta' nai' Yohanis in a'maet ni antuu' on re' naan.

Usif Yesus antuthae too nifu nim an neis

30 Anbi orses, Nai' Yesus In atoup-noni' re' ansonu' narair sin anbi afi ahunut, sin anfain neman oke', ma nabua nfanin nok Ne. Sin natoon are' kanan rasi re' sin nmo'e nrari, nok are' saa' re' sin nanoni' naraar je neu too mfaun sin. **31** Anbi oras naan, too mfaun nao na'onin neum neman he naim Nai' Yesus. Tar antea, In nok In atoup-noni' sin ka napenin fa manuan he nbukaen. Nai' Yesus natanan In atoup-noni' sin nak, "Im he tnao taim baer-ma'koro, he tapein manuan he tasnas akre'o." **32** Oke te, sin ansaen ok-oke' anbi kofa', ma sin nao naim baer-ma'koro, na'roo na'ko kuan. **33** Mes too mfaun sin niit Nai' Yesus sin kofa' naan, es nana te sin nnao nabnoon nefo in ninin. Too mfaun sin anpoin natuin ran meto', ma sin annao ntea nahunun Nai' Yesus nok atoup-noni' sin. **34** Ma reka' Nai' Yesus ansaun na'ko kofa' naan, In niit too mfaun sin anpao nain Je. Tar In ansao ni nmouf. Natuin too mfaun sin ka nahiin fa he nmo'en saa', sin nfanin on re' bib-kase re' ka nmu'in fa atukus. Narari te, In nanoni' sin Uisneno In romin na'ko oras mansi na'puup tar antea mansi nmaeb. Onai ma In atoup-noni' sin natoon Ne mnak, "Amo! Reko nneis Ho mreun too mfaun sin ok-oke', he nnao nsosan mnahat anbi are' kua paumaka' ia. Natuin orsi he nfai jen, ma ka tiit fa mnahat et bare ia." **37** Ma Yesus nataah sin am nak, "Paraak! Hii

es he mfeen sin he nahan." Mes sin nataan nafain Ee mnak, "Amoo! Karu hit tuthae too mfaun ia, hit ro he tapoina' roit ti ko'u! Namnees nok tua-ameput es re' in ntoup in roi mepu anbi toon es! Hit he tapein roi mfaun naan na'ko mee?!" **38** Mes Nai' Yesus nataah sin am nak, "Hii mnao mihiin mit fe', sekau es amneik beti'." Narari te, sin nao natanan ma anfain neem natonan nak, "Anmui' utunu' fua' nim, nok ika' fua' nua goah." **39** Oke te, Nai' Yesus anreun too mfaun naan he ntook nabuan anbi huun. **40** Fin sin ntokon puk nok. Pukan bian nabua nat-natun, ma pukan bian anteni bo' nim-niim. **41** Narari te, Nai' Yesus nait naan utunu' fua' niim ma fin ika' fua' nua. Ma nbaiseun neu neno-tunan ma antoit makasi neu Uisneno. Narari te, In nteib utunu' naan pisa'-pisa', ma anfee sin neu In atoup-noni' sin, he mnao nbatin too mfaun naan ok-oke'. Ika' fua' nua nana msa' In nbait sin neu sin ar-ar sin. **42** Ma sin arsin anbuken tar antea namsenan. **43** Reka sin anbuken nrarin on nana te, atoup-noni' sin nabuab nafani' mnaah anesit naan, naheun 'kora' bo'es am nua. **44** Sin arsin of oni too nifun niim. Naan sin nsoi' nanaha atoni mnais fi nmees. Bifee ma ri'ana' ka maso'ik fa.

Usif Yesus annao npeo' oje fafon

45 Narari te, Nai' Yesus anreun In atoup-noni' sin he mnao nsaen kofa' he mnao nahunun neu kuan Betsaida et nef goe panin. Mes In fe' namaika' nbi naan, he nreun too mfaun sin he mnao nfanin. **46** Ma reka' sin arsin anfanin, In nsae neu to'ef es ma an'onen. **47-50** Oras mansi nmaeb, Nai' Yesus ansanun fain. Ma In niit atoup-noni' sin kofa', antea nrair nef goe tnanan. Mes sin anseop nok ma'tani', natuin kofa' naan annao nmaraban nok ain ko'u. Ma reka' nesnoe nmeu te, Nai' Yesus annao natuin sin. Mes In annao npe'o ha oje fafon. Ma oras In haumaak kofa' nana te, sin nkius niit Ee. Sin namtaun nmaten. Onaim sin maktaan nein es nok es nak, "Hoe! Sa'na es re' ia? Nit goa oo, ai' sa'na?" Mes Nai' Yesus na'uab am nak, "Hoe! Hi kaisa' mimtau! Au es re' ia." **51** Ma oras Nai' Yesus antaam neu kofa', anin naan nasnaas ankoon. In atoup-noni' sin ansanmakan batur-batuur. **52** Sin fe' niit Nai' Yesus In paek kuasat ma ntuthae too nifu niim anneis. Mes sin fe' ka nahiin namneo fa In kuasat naan.

Are' amenat na'ko Genasaret sin annaon neu Usif Yesus

53 Ma reka' sin antean nefo naan in panin, sin nasnasan, ma nsanun anbi kot Genasaret in ninin. **54** Ma reka' sin sanun na'ko kofa' naan, atoni mfaun sin niit sin. Ma sin ankoa'an nak, "Hoe! Nai' Yesus nemen, oo!" **55-56** Sin arsin naenan ma nmaktoon nein anfuun ma nateef, tar antea sin anroi neik are' kanan amenat sin. Asar sin nenan nak Nai' Yesus et bare naan, sin arsin nroi neik are' kanan amenat sin, ma natupa' sin anbi mnera' husona'. Sin natenb ein nak, "Asar amenat sin anreo' naan Nai' Yesus In baru mnanu' in tuuk ne msa', sin of narekon." Ma sin nareok nanin.

Atoran mansian kaisa' naneuk Uisneno In atoran

7:1 Atoni' pukan Farisi bian ma tunggur krei Yahudi bian anteni' neman na'ko Yerusalem he natefan nok Nai' Yesus. **2-5** Atoni' Farisi sin anna' naheran atoran harat Yahudi. Atoran es es re' karu atoni' he nbukae, ro he nafaun in a'niman natuin harti in romin. On nana msa', karu nfain neman na'ko 'masa', sin ro he naniun fe'. Tar antea sin bare' umi hana' amsa', on re' pika, kras, pois oe, ro he tsaef sin natuina' harat in romin, hena' bisa tpaek sin he taah. Karu anmui' tuaf Yahudi bian re' ka natuin fa harat naan, atoni Farisi sin nato'on. Natuin rasi naan am, es na' sin nato'on oras sin niit Nai' Yesus In atoup-noni' sin nahan, mes ka nafaun fa sin a'nimak. Narari te, sin neman ma nasaan Nai' Yesus nak, "Nansaa' am es ho atoup-noni' sin nahan nok re' sin ka nafaun fa sin a'nimak nahuun? Naan sin nraban hit atoran na'ko mnais unu' sin!" **6-7** Mes Nai' Yesus nataah sin am nak, "Hii re' ia on re' atoni' re' na'uaba' teta', mes hii mo'e teta'! Nahunut Na'i nai' Yesaya antui nain Uisneno In Kabin nak, 'Hii mbo'is Kau, mes arahaa rurum kotim, ma ka mpoi na'ko fa hii nekam. Hii mo'em on nana msa' parsuum. Hii ka mfiroir fa Au romik. Mes hii mituina' haa mansian in romin.' Hii amsa' on re' atoni' sin. **8-9** Hii misaitan mirair Uisneno In romin ma hii mituina haa harat mansian. Hii mahiin mini kaheen! **10** Nahunut Na'i nai' Musa natoon narair Uisneno In aprenat nak, 'M'atoran hi ama' ma hi aina'.' Ma natoon anteni' sin nak, 'Karu tuaf es naseku' in amaf ai' in ainaf ro he thukun tisan.'

11-12 Uisneno nanoni' ki on naan, mes hii minoni' teta' na'ko naan. Hii mak, 'Karu tuaf es anba'an narair he nfee sa'-saa' neu Uisneno, maski in amaf ma in ainaf ansuus anmaten, mes bare' re' naan ka bisa tpak je fa he turun sin, natuin anmanba'an narair he nfee je neu Uisneno.' **13** Es nana te, fe'ena Au 'ak kii, hii mporin main Uisneno In romin, ma hii msek'e meik atoran mansian. Anmui' atoran namfau re' hii msek'e nahuum on re' naan."

Rais re'uf re' anpoi na'ko atoni' in nekan

14 Narari te, Nai' Yesus no'en atoni mfaun, ma nak, "Mneen rek-reko, henati' mihiin. **15** Are' saa' re' antaam neu atoni' tain, ka nha'niis fa in tuan. Mes saa' re' anpoi na'ko in nanan, es re' neik ha'nisit neu in tuan. **16** Nah! Sekau he mneen, te mneen he muhiin!" **17** Narari te, Nai' Yesus nok In atoup-noni' sin annao nasaitan are' too mfaun naan, ma antaman neu um jes. Ma In atoup-noni' sin nataan reta' naan in a'mofun. **18** Nai' Yesus nataah sin am nak, "Te hii ka mihiin fa msa', aa? In a'moufn ii on ia: saa' re' atoni naah ne, in reko kun. Mes saa' re' anpoi nfain naan, in es ka reko fa. **19** Saa' re' hit taah ne, antaam neu hit taik. Narari te, anpoi nfain. (Usif Yesus In sarit nak atoni' bole naah sa'-sa'ah. Ka taras fa.) **20** Saa' re' anpoi na'ko atoni' in nekan, naan es re' neik hai'nisit, tar antea Uisneno nma'niis ne. **21** Rais re'uf namfau anpoi na'ko atoni' in nekan! Rais re'uf sin es re': tenab amre'ut, rais makonit, rais bakan, rais marorot, **22** rais paru', rais makaket, moe' re'uf, puta-kriu huma-huma, sinmakat, mantinus, na'uab na're'uf es, nabeo', ka nahiin fa atoran, ma na'nakfaut. **23** Nah! Are' moe' re'uf naan anpoi na'ko atoni' in nekan. Naan es re' nareu' nafani' in tuan. Uisneno msa' nma'niis ne."

Usif Yesus anturun bifee mnais es re' ka na'ko fa atoni' Yahudi

24 Oke te, Nai' Yesus sin nasaitan bare naan, ma annao neu kot es kan ne Tirus. Antean bare naan, sin antaman anbi um jes, natuin Nai' Yesus ka nroim fa he es-es nahiin nak In et re' naan. Mes In ka bisa na'koro' fa. **25-26** Anbi naan, anmui' bifee mnais es re' in amneem ni ka na'ko fa atoni' Yahudi. Nahoins ee anbi pah Fenesia et propinsi Siria. Oras in neen nak

Nai' Yesus neem, in mnao ma antoit Je he nriu' napoitian niut re'uf na'ko in an-feto. **27** Nai' Yesus na'uab manporin nak, "Ri'ana' sin ro he naah nahunun, oke te na' an'okar mnaah nesif naan neu asu." (Nok tenab ma'nifa', Nai' Yesus ro he nturun nahunun In atoni' Yahudi sin, hena' anturun atoni' bian anteni'). **28** Mes bifee naan nataah am nak, "Namneo, Aam! Mes asu naan in et mei je nupun. Es nana te in naah mnaah amofut na'ko ri'ana' naan in a'pika'." (Nok tenab nak, oras ri'ana' sin nahan, asu naan napeni mnahat amsa'. Maski Nai' Yesus anturun In ini sin, In ro he nkiaus atoni' bian amsa'.) **29** Ma reka' Nai' Yesus anneen on nana te, In na'uab am nak, "Wee, bifee ia fe! Ho uab man namneo! Es nana te aina' ho mfain nai, natuin niut re'uf naan anpoi nrair na'ko ho anah." **30** Narari te, bifee naan anfain. Antea umi te, in anah naan antuup anfiin. Niut re'uf naan anpoi nrair.

Usif Yesus nareko' atoin amuut es, re' ankoos nok amsa'

31 Narari te, Nai' Yesus sin nasaitan kot Tirus, ma mnaon natuin ranan tas je ninin, natuin ranan kot Sidon. Na'ko naan, sin mnao nkonon tar antean nefo Galilea. Narari te, sin mnaon neu pah es nok kot bo'es, re' sin anteek nani nak, 'Dekapolis'. **32** Nbi bare re' naan, anmui' atoin amuut es, re' ankoos nok. In aok-bian sin neik je mnao neu Nai' Yesus. Sin ntotin henati' Nai' Yesus antao In a'niman neu in a'nakan, he nareok ee. **33** Ma Nai' Yesus nasaitan too mfaun sin, ma mnao nmes nok atoni' naan. Nai' Yesus nataam In akrurun neu atoni' naan in ruik nein nua sin. Oke te, In ntao hape anbi In akrurun naan ma anreo' atoni naan in maan. **34** Nai' Yesus anbaiseun neu neno-tunan, anheer In asnasan, ma naprenat nak, "Efata! " (in a'moufn ii nak, "Mutfe'i nai!") **35** In na'uab ona ha re' naan, mes atoni' naan in ruik ni anneen nain oras naan. Atoni' naan in maan ama'tanes naan anma'nuur nani msa', tar antea in na'uab nok reko. **36** Oke te, sin nua sin annao nfanin neu too mfaun. Nai' Yesus antaar sin am nak, "Amneen, oo! Nati' kaisa' mitonan es-es mak Au 'ureko' 'urair atoni' ia." Mes maski Nai' Yesus antaar sin nok ma'tani' amsa', sin na'uabin piut-piut anbi are' bare-bare. **37** Too mfaun re' anneen uab mantonas naan, ansanmakan

maten. Sin na'uaban nak, "Ma'taen bese! Atoni re' ia anmoe' are' sa'i reko oke'. Akoost ate nneen. Amuut ate na'uab."

Nai' Yesus ntuthae atoni' nifun haa

8:1-3 Ka 'roo nteni fa on nana te, anmui' too mfaun neem nabuan he nneen Nai' Yesus. Sin natuin Ee tar antea neno teun goen. Es nana te, sin nararin beti'. Narari te, Nai' Yesus no'en naan In atoup-noni' sin am nak, "Au ansao ki nmouf nok too mfaun ia. Bian neman na'ko bare 'roo, ma nabuan neno teun goen, tar antea sin nararin beti'. Reko nneis sin kaisa' anfanin nok tai ruman. Kas-kaisa' sin tuamafun anbin ran atnana'." **4** Nai' Yesus In atoup-noni' sin nataah nam nak, "Aam! Bare ia na'roo na'ko kuan. Es nana te, hit ka neu tuthaetan fa too mfaun ia!" **5** Nai' Yesus nataan sin am nak, "Hii mmui' utunu' fua' fauk?" Sin natahan am nak, "Aam! Hai mitunu' utunu' fua' hiut goah." **6** Oke te, Nai' Yesus anreun atoni mfaun naan he ntokon anbi afgui. Narari te, In nait utunu' fua' hiut naan, ma ntoit makasi neu Uisneno. Narari te, In anteib utunu' naan pisa'-pisa' neik In a'niman, ma anfee sin neu In atoup-noni' sin. Sin nnao ma nbait neu atoni mfaun ok-oke'. **7** Ma sin napenin ika'-ika' amsa'. Narari te, Nai' Yesus antoit makasi nteni' neu Uisneno antoom ika'-ika' naan. Oke te, In nreun In atoup-noni' sin, he nnao nbatin nteni' neu too mfaun. **8-9** Sin arsin ok-oke' oni' atoni' nifun haa. Sin nahan tar namsenan. Naah nararin on nana te, atoup-noni' sin nabuab mnaah nesif naan naheun 'poni hiut. Narari te, Nai' Yesus anreek sin he nfanin ok-oke'. **10** Ma oras sin nnao nfanin, on nana te, Nai' Yesus nok In atoup-noni' sin ansaen neu kofa', ma mnaon natuin nefo naan in ninin, neu bar jes in kan ne Dalmanuta.

Atoni Farisi sin namin ranan he namouf Usif Yesus

11 Ma oras Nai' Yesus sin antean Dalmanuta, anmui' tuaf-tuaf na'ko pukan krei Farisi neman he nateef nok Ne. Sin nataan na'ke't Ee. Sin toit Je mnak, "Aam! Mukrira' rais sanmakat henati' anfani 'tope' re' mamnita', nak namneo Ho mupein ma'tanif na'ko Uisneno." **12** Nai' Yesus anheer In

asnasan ma nak, "Karu Au 'neen hi uabam naan, Au neek ki nme'jon! Nansaa' am es hii mtoit rais sanmakat? Kaisa' on naan! Rais sanmakat ro nmui' msa', mes Au ka' mo'e 'fee ki fa." **13** Narari te, Nai' Yesus annao nasaitan sin, ma ansae nfain anbi kofa' nabua nok In atoup-noni' sin. Ma sin nmrakan neu nefo naan in panin.

Usif Yesus nanoni' nak ampanat mirek-reko' atoni' Farisi sin rais makopo'

14 Ma oras Nai' Yesus sin antean nefo naan in atnanan, na' atoup-noni' sin namnaun, nak sin nikan nak sin ka nekin fa beti'. Suma sin neik utunu' fua' mese'. **15** In anneen sin na'uaba' nteek utunu' on nana te, Nai' Yesus nak sin am nak, "Hii ro he mpanat rek-reko! Kaisa' hii mtoe mituina' Usif Herodes ma atoni' Farisi sin rais makopo' amre'ut. Sin rais kopo' naan, nahuum on re' muur ii ankuum nabuab ee nok uut." **16** Anneen In na'uab on nana te, In atoup-noni' sin ntaka'naan ein. Ma sin na'uab ein nak, "Atoni mnasi' ne na'uab rais saa', ka? Oni' In na'uab on naan, natuin hit ka teik fa utunu'." **17** Mes Nai' Yesus nahiin sin nek tenab. Es nana te, In na'uab am nak, "Nansaa' am es hii mi'uaba haa utunu'? Hii ka mheek fa Au sair ti, oo? Hii roen mini nbufun maten! **18** Hi miit mirair meik hi mat mini jen, mes hii ka mihiin fa in a'mofun! On re' hii ka mit-mitaf! Hi mneen meik hi rukim, mes hii ka mihiin fa sa'-saa'. On re' hii ka mneen miit fa msa'! Hi mnikan main **19** utunu' fua' nim re' Au teib sin pisa'-pisa' ma 'tuthae too nifun nima, oo? Neno naan hi mibuab man utun anesit 'kora' fauk?" Sin natahan am nak, "'Kora' bo'es am nua, tua." **20** Nai' Yesus natahan anteni' nak, "Hii fe' mimnau re' neno naan ai' kah, oras Au 'tebi' bait utunu' ma 'tuthae too nifun haa, ai' ka? Hi mibuab man utun nesif naan 'poni fauk?" Sin natahan am nak, "'Poni hiut, tua!" **21** Ma Nai' Yesus nak, "Namneo! Hi miit nok hi matam. Mes nansaa' am es hii ka mihiin fa, Au ma'tain ki in amneem ni na'ko mee?"

Usif Yesus nareko' atoin aforot mese' anbi Betsaida

22 Narari te, Nai' Yesus sin antean kuan Betsaida. Anbi naan, sin neik

atoin aforot es neu Nai' Yesus. Sin ntoit Nai' Yesus he nasbeot nareko' atoin aforot naan. **23** Es nana te, Nai' Yesus antoup atoni' naan in a'niman ma neik je npoi neu kuan ee in kotin. Ma In npuran hape neu atoni' naan in matan, ma In reo' atoni' naan in matan. In nataan am nak, "On mee? Ho miita', ka?" **24** Atoni' naan na'aiti in matan, ma nkisu 'ri ma 'ne'u, ma in nataah am nak, "Tua! Au 'iit atoni' anbaknao nein. Mes humne on re' au 'iit hau nggoe es anao tein!" **25** Ma Nai' Yesus antao nteni' In a'niman neu atoni' naan in matan. Ma atoni' naan ankisu nteni', ro batuur in niit reek goen. Oras ia in niit nok akninu'. **26** Oke te, Nai' Yesus anreun atoni' naan he nnao nfain, mes namnaub ee nak, "Ho mfain nai, mes amnao mutuin ran teta! Kaisa' amnao mfain meu Betsaida."

[Nai' Petrus anmanaku' ma namneoba' nak Usif Yesus naan Kristus, atoni' re' Uisneno anruur naan Je na'ko unu'](#)

27 Narari te, Nai' Yesus sin annao funan ma nateef kuan-kuan anbi Kaisarea Filipi. Anbi rana tnana' te, Nai' Yesus nataan sin am nak, "Karu tatuin too mfaun sin uab keni, sin nak Au re' ia sekau Kau?" **28** Sin natahan am nak, "Bian sin nak 'nai' Yohanis Asranit'. Bian sin nak, 'na'i nai' Elia', mafefa' kninu' Uisneno. Ma bian anteni' sin nak, Ho re' ia tuaf es na'ko mafefa' kninu' ahunut sin." **29** Ma Nai' Yesus nataan anteni' neu sin nak, "Mes natuin hii mahiin mini te, Au re' ia sekau Kau?" Nai' Petrus nataah am nak, "Ho re' ia Kristus, re' Uisneno anruur naan Je na'ko unu'." **30** Ma Nai' Yesus antaar sin mates nak, "Ka nabei' fa he hii mitonan sekau-sekau, saa' re' nai' Petrus na'uab ee ia!"

[Usif Yesus natoon In ma'ne'at ma In neno' maten](#)

31 Narari te, Nai' Yesus murai natonan In atoup-noni' sin am nak, "Au re' ia, An Mansian Kau. Au of 'upein rasi ha'mu'it namfau, natuin a'nak harat sin, a'nak rasi pirsait sin, ma tunggur krei sin ok-oke antita' Kau. Sin of anroor niis Kau, mes nmeu te, Au 'moni 'fain." **32** Nai' Yesus natoon mat-maat on naan, onaim nai' Petrus anheer napaisb Ee, ma nakai Ne nak,

"Aam! Kaisa' mu'uab on naan! Au ka neu he konan sin fa, he nman Ko."

33 Mes nai' Petrus in uaban naan ka natuin fa Uisneno In romin. Es nana te, Nai' Yesus anniik ma nkius In atoup-noni' bian sin. Narari te, In nakaina' nai' Petrus nok ma'tani' nak, "Hoe! Nana niut re'uf sin A'nak Ko'u kein in uaban! Mu'roo mu'ko ia! Ho suma mutenab meik tenab mansian, mes tenab naan ka natuin fa Uisneno In romin!" **34** Oke te, Nai' Yesus anhaman are' atoni mfaun he neem nabuan nok In atoup-noni' sin. Ma In nanoni' sin nak, "Atoni re' anroim he natuin Kau, ro in he naran ma natuina' neno-neno! In ro he nnikan nain in romin kun, ma natuin neu romif Uisneno. Maski atoni he nroor goe msa', in natuin piut. In on re' atoni' nasaah in hau nehe he nnao nkuus na'peti' niis ne. **35** Fin atoni' re' anroim he nmaet natuin in nok Kau, of in nmoin nabar-baar nok Uisneno. Mes atoni' re' anmoin arahaa neu in tuan, of in moin ni ka ma'osa' fa! **36** Amneen, oo! Karu ho mui' pah-pinan in afni oke', mes Uisneno antita' ko, ho he mupein saa'? **37** Maski nak ho mroe meik pah-pinan in afni oke' msa', mu'if naan ka neu he ntuik naan fa ho sman mi! **38** Mimnau nai! Atoni' pah-pinan oras ia anmo'en re'uf huma'-huma'. Sin ka nfiroir fa Uisneno. Es nana te, sekau re' he natuin Kau mes namaebon, ai' natuina' Au noin ki mes namaebon, of Au msa' 'umaebok he 'manaku' in tuan ni anbi Uisneno In matan. Natuin Au, An Mansian ia, of Au 'fain 'uum u'ko neno-tunan. Ma ameput Uisneno na'ko neno-tunan of naub Kau. Oras hai msaun im mi'ko neno-tunan meik Ama In pinan ma krahan, of mansian ni na' nahiinin nak mneo ni Au sekau Kau.

9:1 Hii kaisa' nnikan Au uabak ia. Na'ko hii arki ok-oke' re' ia, of anmui' tuaf re' fe'en nmoin fe' tar sin niit Uisneno antook ma naprenat neik kuasat ma'tani'."

[Usif Yesus na'bani', ma In baer pake nariim anbi to'ef in tunan](#)

2 Neno nee ankonno te, Nai' Yesus antoit nai' Petrus, nai' Yakobos, ma nai' Yohanis, he nnaon nsaen bua'-bua' on to'e-mnanu' es, re' ka nmui' fa tuaf. Oras sin antean in fafon, sin nkius niit Nai' Yesus na'bani'. **3** Ma In baer pake naan anfanin muti' ma nariim. Ka nmui' fa bare' pah-pinan re' muit ni

namnees nok In paken. **4** Nok askeken, sin niit Nai' Yesus na'uab nok na'i nai' Elia ma fin na'i nai' Musa. **5-6** Sin teun sin namtaun maten. Nai' Petrus antaka'nana', tar in na'uab tafi'-tafi'. Narari te, in natonan Nai' Yesus nak, "Aam! Hit bi iat na'reko nneis. Reko te, hit atmoe' uim ropo teun. Es neu Ko, Aam. Es neu na'i nai' Musa, ma es anteni' atfee je neu na'i nai' Elia." **7** Oke te, nok askeken nope ansaun neem ma an'aum naan sin. Ma sin anneen hanaf es anpoi neem na'ko nope naan am nak, "Amneen nai joo! Nai' Yesus re' ia Au An neka'. Hii mneen ma mituin mirek-reko' In uaban!" **8** Oras nai' Petrus sin anneen hanaf naan, sin ankisun fuun ma nateef, mes nok askeken sin ka niit anteni' fa tua nua ee nee. Suma Nai' Yesus annees. **9** Narari te, Nai' Yesus nok In atoup-noni' sin ansanun na'ko to'ef naan. Ma Nai' Yesus antaar sin am nak, "Saa' re' hii fe' miit mirari naan, hii kaisa' mitonan es-es. Au re' ia, An Mansian, Au ro he 'maet fe'. Karu Au 'moni 'fain, na' hii mitoon rasi naan neu too mfaun." **10** Sin nnaa' naheran Nai' Yesus In rais manba'an naan, ma sin ka natonan fa es. Ma sin teun sin anmaktan nein es nok es nak, "In sair ti, on mee, es na' In nak, In he nmoni nfain na'ko In a'maten re' naan? Nok ranan mee?" **11** Ma sin nataan Ne ma nak, "Tunggur krei sin nak na'i nai' Elia ro he neem nahuun fe', rari te na' Kristus neem. Mes Aam, natuin Ho teen bit, on mee?" **12** Ma Nai' Yesus nataah am nak, "Namneo on naan. Na'i nai' Elia neem nahuun fe', he nfei ranan neu Kristus, atoni' re' Uisneno anruur nani na'ko un-unu'. Mes on mee? Hii ka mihiin fa saa' re' sin tui nani et Uisneno In Sur Akninu' anmatoom nok An Mansian? Natuin sin antui narari ma nak, karu In neem antea te, atoni' of anha'mui' Je ma sin of anroor nisan. **13** Ma hii ro he mtakan hii ruik min rek-reko jo! Na'i nai' Elia neem anraar jen. Ma atoni' nha'mui' je, natuin sin romik. Naan namnees nok saa' re' sin na'i antui naan je et afi unu'."

[Usif Yesus nareko' ri'an es re' niut reu' fes antaam ne](#)

14 Oras Nai' Yesus nok In atoup-noni' tuaf teun natefan nfanin nok atoup-noni' bian, sin niit too mfaun nabuan. Too mfaun naan neman he niit atoup-noni' bian anmatoen nok tunggur krei sin. **15** Oras too mfaun sin niit Nai' Yesus te sin naskeken, fin sin nak ai' In fe' nabarah et to'ef in tunan.

Ma sin naen nseun In. **16** Oke te, Nai' Yesus nataan sin am nak, "Him matoen rais saa' mok sin?" **17** Ma atoin es neem ma nak, "Aam, amneen fe'! Au 'eik au an-mone henati' Ama' mureko' man ee. In nmuu, ma ka bisa na'uaba' fa, fin niut reu' fes antoom ee. **18** Karu niut re'uf naan antaam, in nbeson ri'ana' naan neu afu. Narari te, ri'ana' naan in haep ne na'furi', ma in neuk niis nein. Rarit in aon naan nruur goah on hau meto. Au 'toit 'iit Ho atoup-noni' sin, he sin nriu' niut re'uf naan. Mes sin ka bisa fa." **19** Anneen on nana te, Nai' Yesus naskara' sin am nak, "Hoe! Hii on he bainesi' ki! Au 'unoni kii fani-fani, mes hii ka mhe-heek man fa. Ma hii ka mpirsai Kau fa batur-batuur! Au he 'sabaar kii tar antea reka'! Meik Kau ri'ana' naan neem neu ia!" **20** Oke te, sin naskau neik ri'ana' naan neem neu Nai' Yesus. Oras niut re'uf naan nkuis niit Nai' Yesus on naan, in nbonan ri'ana' naan ma antitu' anbi afu, ma in haep-bua-neor ni nsae. **21** Narari te, Nai' Yesus nataan ri'ana' naan in amaf nak, "Ho aan hi in meen si na'ko rek-reek ii?" In amaf nataah am nak, "Na'ko in an-ana' fe'. **22** Niut re'uf naan he na'maet au an hi 'ro-roo goen. In nbeson au an hi fani-fani nbi ai, ma nareem ee anbi oe. Es nana te, Aam, amturun kau fe'! Karu reko te, amneek kai, he mureko' man au anah ia." **23** Nai' Yesus nataah am nak, "Nansaa' am es ho mak 'karu reko'? Namneo Au bisa 'moe' are' sa'-saa', asar atoni' ro he npirsai fe'!" **24** Narari te, atoni mnasi naan nataah ma nkae nok, nak, "Aam! Namneo, au 'pirsai 'urair. Mes amturun kau he au 'neek atebes ia ma'tani' antein!" **25** Oras naan, Nai' Yesus nkuis too mfaun murai neem nauban sin. Onaim In naprenat niut re'uf naan am nak, "Hoi! Niut aburarut! Ho mpoi nai mu'ko ri'ana' ia, he in bisa nneen, ma in bisa na'uaba'. Ho kaisa' mtaam amteni' meu ne!" **26** Anneen Nai' Yesus na'uab on nana te, niut re'uf naan anhunun naher-heer. In nmoe ri'ana' naan antikoib ma npaiteet koon, oke te na' anpoi nasait ne. Ma ri'ana' naan antuamauf on re' anmate nrair. Tar antea bifee-atoni' anbi naan na'uaban nak, "Nah! In mate nrair!" **27** Oke te, Nai' Yesus anna' ri'ana' naan in a'niman, ma anfiit nafeen ee. Ma ri'ana' naan anfeen nain oras naan. **28** Oke te, Nai' Yesus nok In atoup-noni' sin nnao nasaitan bare naan, ma antaman neu um jes. Anbi naan sin nataan Nai' Yesus nak, "Aam! Nansaa' am es fe'ena hai ka bisa mriu' man fa niut re'uf naan?" **29** Ma Nai' Yesus natonan sin am nak, "Amneen

rek-reko! Niut re'uf sin ro amaun tein. Es nana te, karu hii ka m'onen he mtoit fa Uisneno, hii ka bisa mriu' fa niut re'uf naan."

Usif Yesus natoon anteni In rasi 'maten

30 Narari te, Nai' Yesus nok In atoup-noni' sin nnao nasaitan bare naan, ma antaman neu propinsi Galilea. Oras naan, Nai' Yesus ka nroim fa he atoni' nahiin nak In et bare naan. **31** Mes In arahaa he nanoni' In atoup-noni' sin. In natonan sin am nak, "Ka 'roo fa heen, sin of na'sosa' Kau neu atoni' teta'. Oke te, sin nroor niis Kau, An Mansian ia. Namneo Au ro he 'maet, mes anbi nmeu te, Au of a'moni 'fain." **32** Nai' Yesus natoon on naan, ma In atoup-noni' sin naskeken ntaka'nan ein. Sin ka nabrain fa he nataan anteni' Nai' Yesus In tenbi on mee.

Usif Yesus In atoup-noni' sin matoen neu sekau es re' ko'u meis

33 Narari te, Nai' Yesus sin annaon ntean Kapernaum. Ma oras sin antaman anbi umi, In nataan neu In atoup-noni' sin am nak, "Fe'ena hii matoena' rais saa', ka?" **34** Mes ka tiit fa es nataah, fin sin nbi raan ne tnanan, sin matoen neu sekau es ko'u meis anbi sin. **35** Oke te, Nai' Yesus antook ma nanoni' sin am nak, "Sekau es anroim he nrair atoin ko'u, in ro he nroim he nfain atoin neek a'baut, he ntuthae atoni mfaun." **36** Oke te, Nai' Yesus naskau naan ri'an es anbi naan, ma nhake nfain anbi sin atnanak. Ma In na'uaba' nak, **37** "Sekau re' natuin Kau ma ntuthae too ana' on re' ri'an a'baut re' ia, huma' mese on re' in tuthae Kau msa'. Ma in imsa' antuthae Au Ama' re' ansonu' Kau he 'taam uum anbi pah-pinan ia."

Sekau es re' anfain hit atoin'a

38 Narari te, Nai' Yesus In atoup-noni' nai' Yohanis, natraak am nak, "Amo! Anbi orses, hai miit atoin es anpaek Ho kanam ma nriu' niut re'uf sin. Mes hai mtaar ee, natuin hit ka atoin'a fa." **39** Mes Nai' Yesus nataah am nak, "Hoe! Hii kaisa' mikain ee. Fin sekau es anpaek Au kanak he nmoe' rais sanmakat, in of ka neu na'uab na're'uf fa Au kanak. **40** Karu in

ka nraban kit fa, on nana te in re' naan hit atoin'a msa'. **41** Es nana te, mimnau rek-rek go! Karu anmui' atoni' re' nahiin nak hii mituin Kristus, rari te in nturun ki, Uisneno ka neu nnikan fa in haet naan. Maski in suma na'inu' ki neik oe ruman kras es amsa', Uisneno ka neu nniik ne fa."

Kais amkua'noon mok sanat

42 Oke te, Nai' Yesus natonan nteni' sin am nak, "Karu atoin es anmo'e nsan neu ri'an es, tar in ka npirsai nteni' Kau fa, ampantom, oo! Reko nneis, nait faut ko' goes, ma nfuut goe neu in neon, ma nporin nataam in tuan neu tas je tnanan. **43** Karu ho musanab meik ho nimam, mketu mporin ho nimam naan! Fin reko neis ho mtaam meu sonaf neno-tunan meik ho nimam mese', na'ko sin anporin nataam ko neu ai maputu' ma ai marara' abar-barat meik ho nimam nua. **44** Ai marara' naan, namneo-namneo baer naan a'renat. In ai ji ka nmaet niit fa. Ma are' kauna' so' ji nsoe nareo' ka nas-naas fa. **45** Karu ho musanab meik ho haem, mketu mporin ho haem naan. Fin reko neis ho mtaam meu sonaf neno-tunan meik ho haem mese', na'ko sin anporin nataam ko neu ai maputu' ma ai marara' abar-barat meik ho haem nua. **46** Ai marara' naan, namneo-namneo baer naan a'renat. In ai ji ka nmaet niit fa. Ma are' kauna' so' ji nsoe nareo' ka nas-naas fa. **47** Ma karu ho musanab meik ho matam, mro'i mporin ho matam naan. Fin reko neis ho mtaam meu sonaf neno-tunan meik ho matam mese', na'ko sin anporin nataam ko neu ai maputu' ma ai marara' abar-barat meik ho matam nua. **48** 'Ai marara' naan, namneo-namneo baer naan a'renat. In ai ji ka nmaet niit fa. Ma are' kauna' so' ji nsoe nareo' ka nasnaas fa.' **49** Au nonik ia, ro ma'fena'. Es nana te, sekau es he natuina' Kau, ro in he ntahan he nok piut, on re' sis se'ik naan ro he npaek masak, hena' sisi naan antahan a'roo. **50** Masik naan, ro reko. Hit pak je he taminab mnahat. Mes karu masak naan ka min masak fa heen, he tpak je neu saa' antein? Ro hit taiti tpoir nahe. Hii msa' ro he mfain on re' masak, he mmoin nok manekat mok are' atoni mfaun sin. Nah! Hii kaisa' matoe mteni' nai, mak sekau es ko' gui, ma sekau es an ii."

Atoni' Farisi sin namin ranan he namouf Usif Yesus natuina' rasi matsaos ma manporin

10:1 Narari te, Nai' Yesus sin annaon neu propinsi Yudea, ma neu bare bian anteni' et noe Yarden in panin, pasa' neon-saet. Anbi naan, too mfaun neman ma naub Ne. On re' nati', Nai' Yesus nanoni' sin. **2** Atoni Farisi fauk neman he namouf Nai' Yesus. Sin natanan nak, "Natuin hit atoran rais-pirsait, reko ai' kah, karu atoin amatsaos es anporin in fee?" **3** Mes Nai' Yesus nataah sin nak, "Mimnau fe! Rasi atoran fee-mone re' Nai' Musa anba'an nani neu kii nak on mee ka?" **4** Sin natahan nak, "Na'i nai' Musa in atorni nak, atoni' nabei' he nporin in fee, mes ro he nmoe' nahunun sur manporin ma annona' surat naan neu in fee." **5** Mes Nai' Yesus nataah sin am nak, "Hoi! Amneen fe! Na'i nai' Musa antui on naan, natuin hii mi'nakfaut bainesi!" **6** Hii kaisa' mnikan rais reta' un-unu' oras Uisneno anmoe' neno-tunan ma pah-pinan! Natuin matu'i narair et Sur Akninu' nak, 'Uisneno anmoe' mansian nahuum bon on bifee ma atoni. **7** Es nana te, atoin es ro he nnao nasaitan in ainaf ma in amaf, ma anmafuut neek nok in fee, **8** tar nua sin anfanin mese!' **9** Karu Uisneno neiknon nabuab sin anfanin mese', ka nabei' fa mansiani anbatis sin!" **10** Narari te, Nai' Yesus nok In atoup-noni' sin antaman mesen anbi um jes. Anbi naan, sin nataan Nai' Yesus matoom nok In nonin re' fe'ena. **11** Nai' Yesus nataah sin am nak, "Sekau re' anporin in fee, ma annao nsao nteni' bifee 'teta', nana msa' antaam rais makaket! **12** On nana msa' bifee! Karu in porin in mone, oke te in nsao ntein atoni' teta', nana msa' antaam rais makaket!"

Usif Yesus na'uab ma anfee tetus neu ri'ana' sin

13 Anbi orses, sin neik sin anah sin neem neu Nai' Yesus, ma antotin he In nfee tetus neu sin. Mes Nai' Yesus In atoup-noni' sin nakaina' sin. **14** Reka Nai' Yesus niit rasi nana te, In nato'on In atoup-noni' sin am nak, "Mifetin ri'ana' sin he neman neu Kau! Kaisa' mikaina' sin! Natuin atoni re' nahuum bon on sin re' naan, es na' anfain Uisneno In nna. **15** Mimnau rek-reko! Sekau-sekau re' neman haumaak Uisneno, sin ro he namnau niis Ne, on re'

anah-anah sin namnau sin ainaf ma sin amaf. Karu kahaf, ka nabei' fa he 'teek sin tak Uisneno In nna." **16** Oke te, Nai' Yesus anhoo naan ri'ana' sin, ma In antao In a'niman anbi sin a'nakak mese'-mese' he nfeen sin tetus.

Atoin amu'it naim ranan he nmoin nabar-baar nok Uisneno

17 Ma reka' Nai' Yesus sin he mnaon konon, anmui' atoin amui' tes naen neem he nateef nok Ne. In na'ruri' anbi Nai' Yesus In matan, ma natahan am nak, "Aam tungguru re' au 'hormat ani! Au he 'utaan akre'o. On ai, Aam. Of au he 'moe' on mee kah, henati' au bisa 'taam on sonaf neno-tunan, he 'moin 'ubar-baar 'ok Uisneno?" **18** Nai' Yesus nataah am nak, "Nansaa' am es ho mteek mak, 're' au 'hormat ani'? Ka tiit fa es re' he thormat ani, karu mak Uisneno nmees. **19** Ho muhiin murair prenat Uisneno ahunut sin nak, 'Kaisa' mroor atoni; kaisa' mmakaek; kaisa' mibaak; kaisa' msaksi mipoi; kaisa' mputa-kriu atoni' in bare'; ma mi'parnom meu ho aina' ma hii ama'." **20** Atoni naan nataah am nak, "Namneo, Aam tungguru! Au 'unaoba' ar kanan atoran sin na'ko oras au fe' munif kau." **21** Nai' Yesus nneek niis atoni naan. Ma In nak, "Namneo! Mes anmui' es anteni'. Es nana te, ho mfain nai he mu'sosa' main are' kanan ho 'mu'im. Narari te, meik roit re ho mupein je naan ma mnao he mbait main sin neu ama'mu'it sin. Oke te, ho uum nai he mutuina' Kau. Uisneno of anseun-banin ko neki 'mu'if neno-tunan." **22** Ma reka' in neen Nai' Yesus In uaban nana te, in nekni nakrati'. Ma in fain nok in nekni nsuus anmaet, natuin in atoni' re' anmui' are'-kanan 'mui' fi oke'. **23** Ma Nai' Yesus ankisu nfuun am nateef ma na'uab nok In atoup-noni' sin am nak, "Amneen, oo! Atoin amui' ti na' neu-goah antaam on sonaf neno-tunan!" Bikase' unta **24** Anneen rasi nana te, atoup-noni' sin anmukekon. Ma Nai' Yesus na'uab anteni' nak, "Amneen rek-reko! He trair anah-anah Uisneno te, maneun ni ka an-ana' fa! Kaisa' mitenab am mak ma'kaf-kafa'. **25** Atoin amui' tes he ntaam on sonaf neno-tunan ma anfain on Uisneno in anha te, in sus ti huma' mese' on re' bikaes unta re' antaam neu in o'of, nao natuina' aen tes in konan." **26** Nai' Yesus In uaban naan anmoe' sin anfanin taka'naan ein. Ma sin maktan nein ma nak, "Karu namneo on nana te, sekau ka es re' he napeni 'honis nabar-

baar?" **27** Nai' Yesus ankius sin mese'-mese' ma nak, "Natuin mahinif ma manoef mansiani te, of ka nrarif. Mes mimnau, natuin mahinif ma manoef Uisneno, ka tiit fa saa' es re' of ka nrarif." **28** Narari te, nai' Petrus nmurai na'uab am nak, "Amo! Hai mnikan main are'-kanan sa'-saa' he mituina' Ko. Onaim hai of mepein saa'?" **29-30** Nai' Yesus nak, "Au he 'utoon kim 'ak onai: Sekau es natuina' Kau, ma annao na'roo na'ko in ainaf ma in amaf, in orif-tataf, in anah-anah sin, in rene, in mepu, nok are' in um ji nanan, he nmao natoon Rais Reko Uisneno anbi mee-mee, in of antoup nafani' no naut nes. Are' sa'-saa' re' in nasaitan sin naan, of napein nafani' sin annesi ntein na'ko naan. Ini msa' of napein ha'mu'it natuin in nok Kau. Ma reka' pah-pin ni namreu', in of anmoin nabar-baar nok Uisneno. Rasi re' naan, es anfain seun banit neu ne! **31** Mimnau goo! Natuina' Uisneno in tenab, sekau-sekau es re' na'naeba' in tuan ni te, of na'bauna'. Ma sekau-sekau re' na'paran in tuan ni, natuina' tenab Uisneno, of na'raat ne."

[Ia han tonas nfain era' teun matoom nok Usif Yesus In a'maten](#)

32 Oras naan, Nai' Yesus sin naon on Yerusalem. Nai' Yesus nmao nahuun. Ma In atoup-noni' sin ma tuaf bian anteni' natuina' anbi In kotin. Sin namnau In uaban ahunut, ma sin nmukekon ma namtaun. Narari te, Nai' Yesus no'en naan In atoup-noni' sin anmesen, ma natoon anteni' saa' re' of atoni bian sin anmo' Je anbi Yerusalem. **33** In na'uab am nak, "Hii mneen, oo! Oras ia, hit tnao teu Yerusalem. Au re' ia, An Mansian. Mes anbi Yerusalem sin of na'sosa' Kau neu a'nakat-a'nakat agama ma tungguru-tungguru krei sin. Narari te, sin of anhukun niis Kau. Ma sin anporin napoitan Kau neu ar-kanan atoni' re' ka nahiin fa Uisneno. **34** Narari te, sin na'akan Kau re'uf-re'uf. Sin naroon Kau. Sin anbeos Au aok tar Au aoki papa' oke'. Narari te, sin nroor niis Kau. Namneo, Au of he 'maet. Ma fai nua nkono te, Au 'fena' 'fain."

[Nai' Yakobos ma nai Yohanis antotin he nfanin kaes ko'u](#)

35 Oke te, Nai Sabadius in anhin, es re' nai' Yakobos ma nai' Yohanis, sin

neman neu Nai' Yesus. Ma sin totin nak, "Aam tungguru! Hai he mi'uab man akre'o!" **36** Nai' Yesus nataan sin am nak, "Hii he mi'uab saa?" **37** Sin natahan nak, "Onai, Aam! Nati' karu Ama' Ho mtook ma Ho mnaa' man a'prenti te, hai mtoit he Ama' mutoko' kai, es anbi Ho nimam a'rii ma es anteni' anbi Ho nimam a'ne'u." **38** Nai' Yesus nataah am nak, "Hii nua kii ka mihiin man fa saa' re' hii mtoti. Au re' ia, of 'upein susat ma nana'renat namfau. Onaim, on mee? Hii miteen bet mak, hii msa' mibeil' he mnaben susat ma nana'renat tar ammaet mok Kau, oo?" **39** Sin natahan nak, "Hai mibeil', Aam!" Nai' Yesus nak anteni' sin nak, "Namneo. Hii msa' of mnaben susat ma nana'renat on re' Au. **40** Mes sekau es antook anbi Au nimak a'rii ma 'ne'u, Au ka 'seor fa rasi naan. Natuin rasi naan, Uisneno In es nafeek. In nafeek anrair, sekau-sekau es nabeil' he ntook anbi bare naan." **41** Ma reka' atoup-noni' bian sin anneen nai' Yakobos ma nai' Yohanis sin han totis nana te, sin nato'on maten. **42** Narari te, Nai' Yesus no'en sin ok-oke ma nak, "Onai! Hii mihiin miraar jena, oo? Kaes ko'u re' anna'an prenat, sin es re' nati' te nha'mui' too gui. Tar antea, too gui ka nakbeor in reko fa. Ma nakaf-nakaf anbi pah-pah re' ka nahiin fa Uisneno, sin nanaoba' atoran ma prenat huma'-huma', tar sin too gui ka bisa nait fa sin a'nakan. **43** Mes ka nabeil' fa he hii moe' on naan! Sekau-sekau anbi kii re' anroim he nrair kaes ko'u, in ro he nfain on re' ate he ntuthae in aok-bian sin. **44** Ma sekau es anroim he nfain a'nakat, in ro he nmeup on re' ate. **45** Natuin Au es re' An Mansiani. Mes Au ka 'uum fa he atoni' ntuthae Kau. Au 'uum he 'tuthae too mfaun sin. Au 'uum he 'fee Au 'monik no mes-mese', he 'soi too mfaun sin na'ko sin sanat."

Usif Yesus nareko' atoin aforot

46 Nai' Yesus nok In atoup-noni' ma too mfaun sin neem antean kot Yeriko. Reka' sin he nnaon konon, sin niit atoin aforot es antook ma antoit piut-piut anbi ran ne ninin. In kan ne nai' Bartimeus, nai' Timeus in anah. **47** Reka' in mneen nak akonot naan Nai' Yesus na'ko Nasaret, in nhunun naher-heer am nak, "Yesus! Ho re' naan, sufa'-ka'uf na'ko Nai' Daud! Hai mpao Ko 'ro-roo goen, Aam! Amturun kau fe'!" **48** Ma reka' sin anneen in

hanan naan, too mfaun sin nakain ne nak, "Hoe! Mumninu!" Mes in nhunun naheer anteni', nak, "Yesus! Nai' Daud in sufan! Mumnau kau fe!" **49** Ma Nai' Yesus anhake mnak, "Hii meik je neem neu Kau!" Ma sin naon neu ini mnak, "Noo goah nai! Aam tungguru no'en ko. Uum nai!" **50** Ma reka' in neen hanaf naan, nai' Bartimeus nporen nain in tais, in nfeen ma annao rab-raab he nateef nok Nai' Yesus. **51** Nai' Yesus nataan ne mnak, "Ho mroim saa' na'ko Kau?" Ma atoin aforot naan nataah am nak, "Koi, Aam! Au toit si es re' karu rekot au 'iit." **52** Nai' Yesus nak antein em nak, "Natuin ho mpirsai murair mak Au 'ubei' he 'ureko' ko, es nana te oras ia msa' ho mureok! Mkoenom nai!" Ma in matan aforot sin narekon oras naan. Narari te, in nok annao naat Nai' Yesus.

Usif Yesus sin antaman neu Yerusalem, ma too mfaun sin anboi's Ee on re' kaes ko'u

11:1 Oras sin nhaumak kot Yerusalem, sin antean kuan Betfage ma Betania, eta' to'ef Saitun in abnapan bian.*To'ef naan sin teek et nak 'To'ef Saitun', natuin anmui' po' saitun namfau anbi naan. Anbi bare naan, sin naes naan mina' na'ko hau saitun in fuan sin. To'ef Saitun in a'roo ni of oni' kir goes na'ko kot Yerusalem. Anbi bare naan, Nai' Yesus sin nas-nasan akre'o. Narari te, In nreun In atoup-noni' sin nua he nao nahunun. **2** In nak, "Hii nua kii mnao mihuun meu kuan re' nee. Ma oras hii mtaam, hii of miit bikaes tipu' mese re' anteket nak 'keledai', ka masaena' fa fe', mafutu' et bare naan. Hii mnao mseif in tani ma mheer meik je neem. **3** Ma karu atoni nataan kii nak, 'Nansaa' am es hii mheer meik bikaes tipu' naan?' On nana te, hii mitaah am mak, 'Usi' he npak je. Ma karu npaek naraar je te, hai of meik mifain ee neem." Bikase' hum es re' anteket nak 'keledai' **4** Oke te, nua sin naon, ma sin niit bikaes tipu' naan mafutu' anbi um jes in enon, et ran ne ninin. Ma sin nseif je, he nheer neik je nnao. **5** Mes atoni' fauk re' anhaken anbi naan, nataan sin am nak, "Hoe! Ba'e! Nansaa' am es hii mseif atoni' in bikase'?" **6** Ma sin natahan am nak, "Hai Uis fe nroim he npak je. Karu npaek naraar je te, hai of meik mifain ee neem." Ma tua fin re' naan, nfeen sin manuan he nheer neik bikase' naan. **7** Ma sin nheer neik je nnao

neu Nai' Yesus. Narari te, sin na'peni bikase' naan neik sin po'uk. Narari te, Nai' Yesus ansae. Usif Yesus antaam neu kot Yerusalem **8** Ma reka' sin he noi antaman neu kot naan, too mfaun sin nait sin tai-faof fini ma sin po'uk keni, ma na'been sin anbi ranan. Anmui' tuaf bian an'oet on re' pet no'o anbi ran ne ninin, ma na'been sin anbi ran ne tnanan. Nok mo'et naan, sin he natonan nak sin seun Nai' Yesus nok atoran. Nahuum on re' sin seun kaes ko'u bian. **9** Ma anmui' atoni' bian annao nahunun anbi Nai' Yesus In matan, ma bian namunin. Sin murai nsakanan nak, "Hosana! Hai mbo'is ma mi'naeb Uisneno! Uisneno anfee tetus neu amnemat re' neem ma neik Uisneno In kanan, natuin Uisneno anreun naraar Je neem! **10** Hosana! Hai mbo'is ma mi'naeb Uisneno! Natuin Uisneno he nahake' nafani' usif nai' Daud in aprenat! Hosana! Hai mbo'is ma mi'naeb Uisneno! Natuin Uisneno naprenat nan-nain et neno-ratan!" **11** Ma reka' sin tean kot naan in nanan, Nai' Yesus sin nnaon ntaman anbi Uisneno in Uim Onen Uuf in a'fe'on. Ma Nai' Yesus annao na'oni ma nkius natefan bare naan. Mes natuin ka nmui' fa oras anteni', es nana te sin naon nfanin neu kuan Betania. Uisneno in Uim Onen Uuf nok in kintar

[Usif Yesus antaar hau uu' goes he kais nafua anteni'](#)

12 Noka' kiuk ana' te, sin anpoin na'ko Betania he ntaman fanin neu kot Yerusalem. Anbin raan ne tnanan, Nai' Yesus annaben ate namnaah. **13** In niit hau uuf es et ran ne ninin. Biasa sin naah in fuan. Es nana te, Nai' Yesus nhaumak hau naan he nkius niit, hau naan nafua, ai' ka. Ma oras In ntea hau naan in uun ni te, In ka niit fa sa'-saa'. Natuin hau naan, in orse ka ntea fa fe' he nafua. In fe' he nanoo. **14** Es nana te, Nai' Yesus na'uab neu hau naan am nak, "Natuin ho ka mufua fa, es nana te murai na'ko oras ia, ho of ka mufua miit fa. Ma of ka tiit fa tuaf es he naah niit ho fuam." In atoup-noni' sin anneen ate, In uaban naan ro ma'fena'.

[Usif Yesus antaam anbi Uisneno in Uim Onen Uuf in a'fe'on, ma In naiti nporin bare' sosa' anbi naan](#)

15 Narari te, sin nao nkonon tar antean Yerusalem, ma Nai' Yesus antaam anteni' anbi Uisneno in Uim Onen Uuf. Anbi Uim Onen naan in a'fe'on, too mfaun sin anfein a'masa' ma na'sos' ein kor-kefi, re' biasa sin paek je he nfeen fua'-turu'. Ma reka' Nai' Yesus niit sin on nana te, In nnao ma nriu' napoitin sin. In nbeso nsisa'en mei-mei re' sin paek sin he ntukrin roit, ma nbeso nsiksakan hau 'bena' re sin paek sin he na'sosa koro-koro naan. **16** Ini msa' npenan too mfaun sin he kaisa' nroin bare' ma mnaon refin ntenin natuin Uim Onen naan in a'fe'on. **17** Onaim, In nanoni' sin nak, "Hii mihiin mirair sa'-saa' re' mafefa' kninu Uisneno ntui naan je mnak, 'Au 'ufena' Au Um ji, he are' bifee-atonin na'ko are' uuf-uuf neman he n'oen nen nbi naan.' Mes hii mmoe' Umi naan anfain baer-buat neu abakat sin!" **18** Ma reka' a'nakat-a'nakat rais-pirsait ma tunggur krei sin annenan nak Nai' Yesus anmoe' rasi nana te, sin nato'on ma nek-neuk nisik. Narari te, sin namin ranan he nroor nisan. Mes sin namtaus ne msa', natuin too mfaun sin nroim niis In nonin. **19** Ma oras mansi nmaeb on nana te, Nai' Yesus sin anpoin na'ko kot Yerusalem, ma annaon fanin he ntupan anbi kuan Betania.

[Karu hit pirsai batur-batuur neu Usi', In of anfee sa'-saa' re' hit toti](#)

20-21 Noka' kik-kiku, sin nao nfanin neu Yerusalem. Anbi rana tnana', sin mnaon konon natuin hau uuf re' afina Nai' Yesus na'uab neu ne. In atoup-noni' sin nsanmakan, natuin hau uuf naan anmate nrair tar in a'ba'ne msa' nmeto nmaet. Ma nai' Petrus namnau niit Nai' Yesus In uaban afina'. Narari te, in na'uaba' am nak, "Amo! Mkius miit! Hau uuf re' afina Ama' mtaar ee ji, nmate nrair!" **22** Es nana te, Nai' Yesus nataah am nak, "Namneo on naan! Asar hii msa' mpirsai Uisneno on naan. **23** Karu hii mpirsai batur-batuur, hii of amreun to'ef mese' he nanani' bare neu tasi. Ma Uisneno msa' of nanani' to'ef naan, asar hii kaisa' mpirsai mi'ba'-ba'e! Hii ro he mpirsai batur-batuur neu Uisneno. **24** Nah! Nati' kaisa' mniik noo! Asar hii mpirsai batur-batuur mak Uisneno nabei' he nfee sa'-saa' re' hii mtoti, In of anfee kii on naan. **25** Ma karu m'onen, mes fe' anmui' neek ma'fena' mok es am es, hii ro he mnao he mmarame' mok atoni' naan fe'. Nok re' nana te, na' hii Ama' abit neno-tunan ansaok hii sanat sin. **26** Mes karu hii mipera'

nek ma'fena', ma ka msaok fa hii aom bian sin sanat, hii Ama abit neno-tunan amsa' of ka nsaok fa hii sanat sin."

Sin maktaan nein matoom nok Usif Yesus in hak

27 Narari te, sin naon konon. Ma reka' sin tean Yerusalem, sin ntaman ntenin anbi Uisneno in Uim Onen Uuf. Ma oras sin taman tean in a'fe'on, a'nakat-a'nakat rais-pirsait ma tunggur agama sin neman, **28** ma sin nataan Nai' Yesus nak, "Afina sekau es anreun ko he uum meik taisibu anbi bare ia? Sekau es anfee ko hak!?" **29** Nai' Yesus nahiin im nak sin namin ranan he namouf Oo. Narari te, In nataah sin am nak, "Au msa' at he 'utaan kii. Hii mtoin Kau fe', hena' Au 'utaah kii. **30** Au he 'utaan kii onnai: hii arki mihiin nai' Yohanis, Asrain atoni re' nana, oo? Sekau es anreek ee he nasrain atoni? Uisneno oo, ai' mansian?" **31** Ma sin natenab neu-mneman, ma na'uabin nak, "Amoo! Hit tarair beti"! Karu hit tataah am tak, 'Uisneno es anreun goe te,' In of nataah kit am nak, 'Karu on nana te, neu saa' am es hii ka mpirsai fa nai' Yohanis!?' **32** Mes karu hit tataah am tak, 'Mansian ne es anrenu.' Of are' too mfaun sin ntaisibun. Natuin sin pirsain am nak, nai' Yohanis re' naan mafefa' kninu' Uisneno." **33** Narari te, sin natahan am nak, "Ma neo! Hai ka mihiinif." Ma Nai' Yesus nataah nafani' sin am nak, "Nah! Karu on nana te, Au ka 'utoon kii fa msa', sekau es anreun Kau."

Usif Yesus nareta' antoom atoin ameup po' anggur

12:1 Narari te, Nai' Yesus na'uab anteni nok a'nakat-a'nakat pirsait Yahudi ma tunggur krei sin. In nareta' nak, "Anmui' atoin es ankaun nais fe'u he nseen hau anggur anbi in afu pis es. Oke te, in nbaik po'on naan anfuun am nateef. Ma anmoe' bak he ntoro' fua anggur in oen. Ma in nmoe' tobe. Oke te, in na'seba' po'on naan neu tuaf bian, he sin nmeup po'on naan, henati' napeni nate nbatin. Narari te, in nao neu pah a'teta'. Po' anggur, tobe, nok bak he ntoro' anggur in oen **2** Reka' orsi ntea he nseib anggur in fuan, auf tuaf naan anreun in ate es, he mnao neu ameup po'on naan he ntoit in sapaan. **3** Ma reka' in ntea, ameup po'on sin anheek naan ne. Narari te, sin

anbeso. Oke te, sin nreen nggoe ma nfain rum-ruum. **4** Oke te, auf tuaf naan anrenu nteni' in ate es. Mes ameput sin na'tutu' in tar in a'nak ne papa'-papa'. Ma rari te, sin namae je, ma nriu' na'aenab. **5** Mes auf tuaf naan anrenu nteni' in ate es a'teta'. Ma sin anroor nisan. Mes, maski sin nmoe' onmee-onmee msa', auf tuaf naan anreun in ate sin piut. Mes ameup po'on sin anbeos bian, ma nroor niis bian. **6** Namuni te, arahaa tuaf mese anteni'. Tua mese naan, es re' auf tuaf ee in an-moen mese' re' in nek nani. Natuin ka tiit atein fa ranan bian, es na' in reun in an-mone naan. In natenab at nak, 'Karu au 'reek au an mon ji neik non, sin of antoup goe nok rek-reko, ma sin am saa' of natniin ne.' **7** Ma in reek in anah naan he nmao. Mes reka' atoin ameput sin niit ri'ana' naan nema te, sin na'uaban nak, 'Hoe! Hii mkius miit fe!' A'naefe anfee in an hoin ee neik non neem! Karu 'naefe nmate te, in of es antoup are' baer pusaak sin. Iim he troor tisan, henati' hit par tain are' kanan in a'mu'in sin!' **8** Narari te, sin arsin anheek je, ma anroor nisan. Ma sin nporin in aon amates naan anbi po' ne in kotin. Rais reta' naan antu' ma namsoup on naan." **9** Narari te, Nai' Yesus nataan are' kaes ko'u sin am nak, "Natuin hii tenab, of auf tuaf naan anmoe' saa' ka neu are' apao po'on sin? Natuin Au tenbi te, in of neem ma nroor niis are' ameput sin ok-oke'. Narari te, in na'seba' po' anggor naan neu atoni' bian. **10** Hit arkit trees tiit anbi Uisneno in Sur Akninu' nak, 'Anmui' fat goes re' nahunu te tuknini naiti nporin. Mes oras ia, fatu naan anfain fatu' sukif neu ni ainaf. **11** Uisneno es anpir naan je, ma natoko' fatu naan. Es nana te, hit tiit atrair in masan arekon!'" **12** Kaes ko'un re' naan nahinin nak Nai' Yesus ansair sin neik reta' naan. Sin huma' mese' nok atoin ameup po' anggur sin. Es nana te, sin murai namin ranan he nheek Ee. Mes sin namtausan too mfaun re' anroim Nai' Yesus In noni'. Onaim, sin na' nnaon npoir na He.

[Atoni' bian sin namin ranan he na'nukab Usif Yesus neik rasi baen bea](#)

13 Narair on nana te, a'nakat-a'nakat atoni' Yahudi sin anreun atoni' fauk na'ko pukan krei Farisi ma na'ko parte purtik Herodes neman he nataan Nai' Yesus henati' namouf Oo. **14** Sin neman tean ate, sin nataan Nai' Yesus am nak, "Aam tungguru! Hai arkai mihiinim mak Ama' Ho neek

man ro mne'o, ma ka mputa-kriu miit fa. Ama' Ho mkisu ha atoni' in nekan. Ama' msa'at mutoon-munoon Uisneno In romin, natuin Ama' ka mkius fa humaf. Nah! Oras ia, hai he mitaan uab es. Tatuin hit atorán pirsait Yahudi te, of hit he tbaena' bea neu Uis Ko'u pah Roma, ai ka?" **15** Mes Nai' Yesus nahiin narair nak sin namin ranan he nfuir Ee, he nraban an a'prenat Roma. Ma Nai' Yesus nataah neik han ma'fena' nak, "Nansaa' am es hii he mfuir Kau meik rasi naan! Neu hii mfee miit Kau roit fua es nita!" Ana' aprenat Roma sin roit re' anmo' je na'ko noin muti' **16** Ma sin nona' roit es neu Ne. Ma Nai' Yesus nait ma ntae roit naan. Narari te, In natahan sin am nak, "Sekau in humni es re' ia? Sekau kan ne es re' ntui je ia?" Ma sin natahan am nak, "Re' naan Uis Ko'u pah Roma." **17** Oke te, Nai' Yesus nak, "Nah! Karu on nana te, meik meu ana' aprenat sin saa' re' anfain ana' aprenat sin hak. Ma meik meu Uisneno saa' re' anfain Uisneno In hak." Anneen In han tahas naan, sin arsin sanmakan, natuin In uaban naan namneo. Etun sin ka bisa namouf Goe fa.

Rasi amates anfeen anfain, ma rais matsaos anmu'i ai' kah anbi neno-tunan

18 Narari te, atoni' fauk na'ko pukan krei bian neman he namouf Nai' Yesus. (Sin na'ko pukan krei Saduki re' anpirsain am nak amaetsi ka nfeen anfain nitaf). **19** Sin na'uaban nok Nai' Yesus am nak, "Aam tungguru! Na' nai' Musa antui kit harat es nak: karu atoin es nmaet nasaitan in fee, ma ka nmui' fa anah, atoin amates naan in orif ro he nsao bifee banu' naan. Maut he nfee sufa'-ka'uf neu in tataf re' anmate nrair. **20** Namneo, na' i nai' Musa nanoni' rasi naan. Es nana te, hai mitaan. Anmui' atoni' hiut nma ori-tatan. Moen unu naan nmatsao nahuun; oke te in nmaet, mes ka nmui' fa anah. **21** Onaim in orif re' natuin ee ji ansao bifee banu' naan. Mes ka 'roo fa te, in maet ma ka nmui' fa anah. On nana msa', in orif re' natuin ee ji; in sao bifee banu' naan, ma ini msa' anmaet, mes ka nmui' fa anah. **22** Ma anrari msa' ntom orif-orif amunit sin, tar antea aheet-susu msa' anmaet. Narari te banu' naan anmate msa'. **23** Nah! Oras ia hai mitaan onai: Bifee naan ansao niit atoni hiut! Ma karu pah-pin ni namsopu te, ma Uisneno namonib nafani' amates sin, of sekau es re' anfain mone neu bifee naan?" **24** Nai' Yesus

nataah sin am nak, "Karu hii mitaan on naan, hii ka mihiin namneo fa Sur Akninu' Uisneno In afan. Ma hii msa' ka mihiin fa Uisneno In kuasat. Onaim hii msaan batuur! **25** Amneen! Onai! Ka tiit fa rais matsaos et sonaf neno-tunan. Are' amates re' Uisneno nafena' nafani' sin, ka nmatsaon tenin fa. On nana msa' Uisneno In ameput na'ko neno-tunan ka nmatsaon fa. **26** Onaim, anmatom nok rasi amates he nfeen anfaini ai' kah, Au 'utoon kii on ia. Oni' hii fe' ka mitenab man fa reta' antoom ai re' nout hau ana' mese', mes ka nputuf. Reta' naan nak, Uisneno nak neu nai' Musa nak, 'Ho na'i sin Uisnen goe es re' Au. Sin es re' na'i nai' Abraham, na'i nai' Isak, ma na'i nai' Yakob. Sin arsin na'ruri' ma na'besa' neu Kau, tar antea oras ia.' **27** Nah! Hit tahiinim tak sin na'i sin anmaten nrarin eti-eti ahunut. Mes, natuin Uisneno nak, In fe' anfain sin Usif, esnanat hit tahiin tak, sin monin fanin. Onaim, maski sin anmaten nrarin amsa', sin monin fanin. Namneo, amoin ti na'-na'ruri' ma na'bees neu Uisneno. Mes atoin amaet si, kah fa to? Es nana te, karu hii mnaa' miheran noni' nak, amates sin ka nfeen anfanin fa, hii ro msaan maneno'!"

Rasi tneek Uisneno ma hit aok-bian

28 Anbi oras naan, tunggur krei es nok ma mneen Nai' Yesus ntook ma na'uab nok atoni' pukan Saduki sin. Tunggur krei naan natenab nak Nai' Yesus nataah sin tanas sin nok reko. Narari te, in nataan Nai' Yesus nak, "Aam! Au he 'utaan on ia: Hit atoran harat ma prenat rasi pirsait sin mfau re'uf. Na'ko are' kanan prenat na'i nai' Musa, prenat mee ka, es ro he tanaoba' tahunun?" **29** Nai' Yesus nataah am nak, "Prenat re' ma'osa' nneis anbi Sur Akninu' Uisneno nak on nai: 'Are' kanan too Isra'el, amneen rek-reko! Uisneno ro hit Usif, ma hit A'nakat. Ka tiit fa bian anteni', In mese' kun! **30** Es nana te, hii ro he mneek Ee anneis na'ko bian-bian. Es nana te, hii ro he mimnau Goe piut-piut, mihiin Je, ma mmeup ma'tani' he mituina' In romin.' **31** Ma prenat hae' nua nak: 'Ho ro he mneek ho aok-bian namnees on ho mneek ho tuam.' Prenat nua sin ia es re' ma'osa' nneis. Ka tiit fa prenat bian re' ma'osa' neis pren nua in re' ia." **32** Oke te, tunggur krei naan na'uab anteni' neu Nai' Yesus nak, "Namneo! Re' Ama mu'uab ee

naan, namneo. Uisneno anfain hit Usif, ma ka tiit fa Uisneno teta'. **33** Hit ro he tneek Ee anneis na'ko are' kanan sa'-saa', ma tamnau Goe piut, tahiin Je, ma atmeup taheer he tatuin In romin, ma hit ro he tneek hit aok-bian namnees on re hit neek hit tuak. On re' nanat na' Uisneno nmariin nneis, na'ko hit arahaa tatuin atoran rasi pirsait anmees. Nana reko nneis na'ko hit arahaa troor mu'it he ta'turu, ai' atfee bare' bian neu Ne." **34** Oras anneen in tahas naan, Nai' Yesus natenab nak tunggur krei naan nahiin rek-rek goen. Onaim Nai' Yesus nak, "Ara kre'o te, ho he noi mrair Uisneno ini." Narari te, ka tiit fa es anteni' re' anroim he nataan Nai' Yesus, fin ka tiit fa es re' nabei' Je te.

[Kristus naan, namneo Usif nai' Daud in sufan, mes ini msa' anrair nai' Daud in usif](#)

35 Narari te, Nai' Yesus nanoni' too mfaun sin anbi Uim Onen Uuf Uisneno. Ma In nataan sin am nak, "Natuin hii tenbi on mee? Tunggur krei sin nanoni' am nak, Kristus re' naan es re' tuaf re' Uisneno nruur nani na'ko afi unu. Ma sin tenab nak, In arahaa sufaf na'ko Usif nai' Daud. Mes tenab naan ka namneo fa. **36** Natuin afi unu' Smana Kninu' Uisneno anpaek nai' Daud he ntui nak, 'Uisneno natonan narair au Usi' nak, "Uum he mtook meu baer a'masat et Au 'nimak a'ne'u. Au of a'moe' are' ho musu sin, tar sin na'ruri neu ko.'" **37a** Na'ko nana te, hit tahiin nak Usif nai' Daud anteek Kristus nak 'Usif'. In a'mofun nak, karu sin nak Kristus naan, suma Usif nai' Daud in sufan-ka'un, naan fe ka nanokab fa. Fin In imsa' anfain Usif nai' Daud in Usif."

[Usif Yesus nak, ampantom mi'ko tunggur agama sin puta-kriu kein](#)

37b Oras Nai' Yesus na'uab on naan, too mfaun sin anromin he nneen Ne. **38** Narari te, In natonan nteni' sin nak, "Hii ro he ampantom mi'ko tunggur agama sin. Sin roim he npairiur-sok neik sin baru mnanu', nnao nateef too mfaun, he too mfaun sin niit sin at nak, 'Hoe! Sin ro kaes ko'u batuur!' **39** Karu sin antaman anbi uim onen, ai' nokan nbin fesat, sin namin toko'

arekot henati' too mfaun niit sin. **40** Ma mpantom, oo! Fin sin puta-kriu bifee banu' sin, ma nasiik naan sin umi sin ok-oke'. Ma anbi too mfaun sin matak, sin na'koro' sin moe' re'uf, es re' sin onen mnanu'-mnanu'. Sin romin he atoni' bian nahinin nak sin neek kein muti'. Mes Uisneno of anfee kasat ma'fena' neu sin."

Bifee banu' ama'mu'it na'turu' roi kolekte nneis-neis

41 Narari te, Nai' Yesus antook anbani' neu peti 'turu', anbi Uim Onen Uuf Uisneno. In niit too namfau neman ma ntao sin roi kolekte anbi peti 'turu' naan. In niit atoin amu'it sin neman amsa' ma nataam sin roit namfau anbi naan. **42** Oke te, bifee banu' ma'mu'it es neem ma an'onen nok. In nataam roit sen nua anbi peti naan. Roit naan in 'os ni an-ana'. **43** Onaim Nai' Yesus an napen In atoup-noni' sin am nak, "Hii mkius rek-reko neu bifee banu' ama'mu'it ne. In nataam roit suma sen nua goah, mes in fee nneis na'ko are' kanan afeet. **44** Sin arsin anfeen kolekte na'ko roi nesif. Mes bifee banu' ia in anfee nain in roit sin ok-oke' neu Uisneno."

Usif Yesus natoon nanin sin antoom Uisneno in Uim Onen Uuf in atseran

13:1 Narari te, Nai' Yesus nok In atoup-noni' sin anpoin na'ko Uim Onen Uuf. Oras sin anpoin, In atoup-noni' es naruur Ee Uim Onen Uuf, ma nak, "Aam! Bait Ho mkius miit ia fe! Umi ia in reok ni kah! Sin bakin faut ko' ni reko' maten!" **2** Mes Nai' Yesus nak neu ne, nak "Uim Onen ia, namaas! Mes ka 'roo fa te, sin of anpukai natserab are' fatu-fatu naan."

Neno msopu' fai msopu' in tanar sin

3 Oke te, Nai' Yesus sin mnaon neu to'ef Saitun, ma ntokon nbain ein on Uim Onen Uuf Uisneno. Narari te, In atoup-noni' sin haa, neman ma na'uab nok Ne. Es re' nai' Petrus, nai' Yakobos, nai' Yohanis, ma nai' Anderias. **4** Sin natanan am nak, "Aam! Bait Ho mutoon mufani' miit kai Ho uabam fe'ena. Reka te in orsi ntea? Ma in tanar-tanar sin, on re' mee?" **5** Oke te, Nai' Yesus nataah am nak, "Asar him mpanat rek-reko! Henati' es kaisa'

napoi kii. **6** Natuin of anmui' atoni' namfau neman, ma npaas sin a'bas kein, ma nak, 'Au re' ia, Kristus, atoni' re' Uisneno nba'an nani na'ko unu.' Onaim sin imsa' napoinan atoni namfau. **7** Karu hi miit atoni' anmakenan, ai hi mneen uab anin nak anmui' makenat et me-mee, hii kaisa' mimtau. Natuin are' rasi naan ro he nboor, mes neno amsoup ti fe' ka nteaf. **8** Fin uuf es of anfeen ma nmaraban nok uuf es. Ma fin pah es of anmakeen nok pah es. Ma fin tainuun si anhasu' anbi me-mee. Amnaah si msa' of ma'tain ni kah. Are' rasi ia anfain tanar, namnees on re' bifee a'apu' re' nnaben men-mahoni'. **9** Es nana te, hii arki ro he mpanat rek-reko. Of sin neem ma nheek ki ma nheer neik ki neu umi fek rasi pirsait. Ma sin of anbeos ki anbi uim onen sin nanan. Ma sin of nfuut neik ki neu are' ana' prenat sin, natuin hii mok Kau. Mes rasi nana msa', anfani sraak he hii mitonan sin are' rasi antoom Kau. **10** Mes Uisneno in anah sin ro he nnao natoon nahunun Au Rais Reko neu are' uf-uuf anbi pah-pinan ia, oke te na' neno amsoput antea. **11** Mimnau! Karu sin fuut neik ki neu umi fek rasi, hii kaisa' mimtau mak, 'Au he 'u'ab 'ak saa'? Ai' au he 'utaah am 'ak saa'?' Karu in orsi antea, hii mi'uab mituina' saa' re' Smana Kninu' Uisneno natoon neu kii. **12** Anbi um jes in nanan, karu tuaf es anpirsai neu Kau, of in orif-tataf sin es namin ranan he nroor nisan. Karu anhe es anpirsai, of in amfe kun es neik non anroor niis ne. Ma karu in ainaf ma amaf anpirsai Kau, of in anh ein anroor niis sin. **13** Es nana te, of atoni mfaun sin nato'on niis ki, natuin hii mpirsai meu Kau. Mes sekau es naran tar antea namsoup, Uisneno ro of an fee ne 'honis."

[Ampanat rek-reko natuin neno amsoput anhaumaken](#)

14 Nai' Yesus na'uab ankon ma nak, "Tuaf es re' neik Amre'ut of he neem. In taam ma nhaek anbi baer nuni et Uim Onen Uuf Uisneno, re' ka ma'ota' fa neu ne, tar in ha'niis bare naan. Es nana te, Uisneno annao nasaitan bare naan. Karu hi miit rasi naan, nati' mpanat rek-reko! (Sekau es anrees ia, ro he nahiin!) Naan anfain tanar nak neno-neno susat sin anhaumak re'-reu' feen. Karu hi miit on nana te, abitan propinsi Yudea amfeen maen nai on a'to'ef sin. **15** Ma hii ro he maen rab-raab, he kaisa' msiraak om. Karu tuaf

mee npoi nrair na'ko umi, kaisa' nfain he nait bare' antein. **16** Ma atoni' re' anbi rene, kaisa' anfain nait tainusat antein. Ro he naen ankoon! **17** Re' nsuus annes-neis ji es re' bifee a'apu, ma bifee-bifee re' nasuus ri'ana'. Fin sin ka naen nanan fa. **18** Es nana te, reko nneis hii m'onen ma amtoit henati' rais emre'ut naan kaisa' neem nateef nok oras uran-anin. **19** Fin oras naan, ma'nuuk ii ko' re'uf! Murai na'ko Uisneno nmoe' pah-pinan ia tar antea neno ia, ka tiit fa sustes ko' ni on re' naan. Ma atoni' of ka niit anteni' fa susat nahuum on re' naan. **20** Karu Uisneno ka na'paran fa neno susat naan, ka tiit fa tuaf he nmoni nkoon. Mes natuin Uisneno nneek niis In an piri' sin, es nana te In na'paran neno-neno susat naan. **21** Karu neno naan antea, hii of amneen atoni' sin na'uabin nak, 'Mkius nai! Kristus es ia!' Mes tuaf bian nak, 'Kristus et nee!' Mes nati' hii kais amneen, oo! **22** Ma of anmui' atoni' re' anpoi ma npaas in a'basan am nak, 'Au re' ia, Kristus!' Bian anteni' nak, 'Au re' ia, mafefa' kninu' Uisneno.' Sin of anmo'en rais sanmakat huma'-huma' neik kuasat niut re'uf he nputa-kriu atoni' sin. Sin namin ranan huma'-huma' he nasekeb anah-anah Uisneno. **23** Hii ro he mpanat rek-reko! Neno-neno susat naan fe' ka ntea fa fe', mes Au umnauba' ain ki sin!"

[An Mansia ni In amneman](#)

24 Oke te, Nai' Yesus antaru ntein, ma natonan In atoup-noni' sin am nak, "Karu neno-neno susat sin ankonon ate, Mansi of nameis'ook, Ma fun ni msa' of nasab-saab. **25** Kfuun-kfuun sin of an mofun na'ko nen goe tnanan, Ma are' kuasat neno-tnana' anriik-raknok.' **26** Narari te, na' are' atoni' sin niit Kau, An Mansian ia. Of Au 'uum u'ko neno-tunan. Ma are' too mfaun sin of niit Au kuasak, ma Au masak ok-oke'. **27** Narari te, Au of a'reun Uisneno In ameput-ameput na'ko neno-tunan, he nnaon nabuaba' are' tuaf-tuaf re' Au 'piir 'urair sin, na'ko pah-pin ni tuk-am-tuk, na'ko neon-saet tar antea neon-tees; na'ko ponain tar antea ha'nua'."

[Neno-neno susat anfain tanar neu Usif Yesus In amneman](#)

28 "Au 'ait rais reta' na'ko hau. Karu hau naan in noon namnaut, naan ee nfain tanar nak oras faok-nais ii anhaumaken. **29** On nana msa', karu hi miit neno-neno susat naan neem, on re' saa' re' Au 'utoon 'urair ki naan, naan anfain tanar nak anhaumak he Au 'umeen. **30** Oras ia, amneen rek-reko! Na'ko hi arki ok-oke' re' ia, of anmui' tuaf re' fe'e nmon-nmoin fe', eti neno-neno susat naan antea. **31** Maski neno-tunan ma pah-pinan namneuk, mes Au 'uab ki of nabar-baar."

Usif Yesus In amneman naan ma'nifa'

32 "Ka tiit fa tuaf es nahiin neno mee, ma reku mee, te Au of a'fain 'uum. Uisneno In ameput neno-tunan amsa' ka nahinin fa. Au tua ki msa', ka 'uhiin fa. Suma Au Ama' nmees nahiin. **33** Natuin rasi nana te, hii ro he mpanat rek-reko, natuin hii ka mihiin man fa reka' te in orsi ntea. **34** Of ka 'roo fa heen ate, Au 'nao 'usaitan kii. Mes of Au 'fain 'uum. Namnees on re' tuaf re' annao nporin in umi, neu bare 'ro-roo. In reun in ameput sin he npao in umi rek-reko. Ma in batin nfeen sin es-am-es ate nok in mepu. In naprenat apao eno' he anpanat rek-reko tar antea in fain neem. **35** Hii msa' ate, ro he mpao fai-manas, natuin hii ka mihiin fa oras mee te uim tuaf naan of anfain neem. He mansi nmabe oo, fai tnana sa oo, mansi na'pupu oo, ai' mansi nsae. Hii ka mihiin man fa neu he reka'. **36** Kas-kaisa' in neem nok askeken ate, in napein ki fe' amtuup amfiin ma mikoon. **37** Onaim ma saa' re' Au 'utoon neu kii, Au 'utoon amsa' neu atoni' bian sin am 'ak, 'Hii ro he mpanat rek-reko he mseun Kau.'" Nok rasi nana te, Usif Yesus na'tu'ub In uaban nok In atoup-noni' sin nbin to'ef Saitun.

A'nakat sin namin ran-ma'nifa' he nheek Usif Yesus

14:1-2 Narari te, a'nakat-a'nakat pirsait Yahudi fe' namin ran-ma'nifa' he nheek Usif Yesus. Fin sin he nroor Goe te. Ma sin namin sraak am nak, "Kaisa' fe'! Kaisa' tmanaap he theek Je, fin neon ko' ni anhaumak neen. Kas-kaisa' too mfaun sin napoitan taisibu." Sin na'uaban on naan, natuin nmeu te, atoni' Yahudi sin nateef nok neon ko'u 'Paska', ma 'Fesat Utunu'

ka Maseor Muur fa'. Nok neno-neno re' naan, sin fest ein he namnao nafani' oras ahunut, re' Uisneno napoitana be'i-na'i sin na'ko pah Masir.

Bifée re' anpoin Usif Yesus neik min fobona' ma'osa'

3 Anbi kuan Betania, anmui' atoin es, in kan ne nai' Simon. Nahunut ee, atoni' anmai'niis ne, natuin in nmui' meen nui'-atroki'. Mes oras ia, in nareko nrair. Onaim aa, oras neon ko' gui ka ntea fa fe', Nai' Yesus sin annaon ma nbukaen anbi nai' Simon in umi. Oras sin nbukaen, bifée jes neem nateef nok Nai' Yesus. In na' neik bot fat goes. Narai je nok min fobona' re' ma'osa'. Narari te, bifée naan an'ipu nporin botor naan in neon. Ma in na'peeh Nai' Yesus nok mina' naan, re' anfain tanar nak in hormaat Nai' Yesus. **4** Anmui' atoni' fauk re' nbukaen nok anbi naan. Ma oras sin niit bifée naan anmo'e on naan, sin nato'on ma na'uab nok be'o nak, "Huu! Bifée sa'na es re' ia, es na' in nporin nareuk min fobon ma'osa' re' ia!?" **5** Reko nneis in na'sosa' mina' re' naan! Oke te, in nbait roit naan neu ama'mu'it sin! Natuin min fobona' naan in osni namnees nok kai tuaf es anbi toon es." **6** Mes Nai' Yesus nataah sin am nak, "Hii kaisa' misusab bifée ia! Mko naan! Au 'mariin, natuin in op narair min fobona' neu Au aok." **7** Ama'mu'it sin nok ki neno-neno. Onaim hii bisa mturun sin nsuun oras. Mes Au te, of ka 'roo fa te, Au ka neu he 'ubua 'teni' fa 'ok kii. **8** Au moin ki ka 'roo fa hen. Ma bifée re' an'opan mina' fe'e na, in nparoir nain Au aok ii, on re' in kaki' nain fobona' neu Au aok ta'uk. **9** Mimnau rek-reko"! Rais Reko' Uisneno nanao bon nbi mee-mee, atoni' of nareta' bifée ia in mo'en arekon. Maut he atoni' namnau goe."

Nai' Yudas naim ranan he na'sosa' Usif Yesus

10 Narari te, tuaf es na'ko atoup-noni' bo'es am nua, in kan ne nai' Yudas Iskariot; in npoi nnao ma naim a'nakat-a'nakat pirsait Yahudi sin, he na'sosa' Nai' Yesus neu sin. Oras in nateef nok sin, in nateaba' sin in sarit. **11** Oras a'nakat-a'nakat sin anneen nai' Yudas in uaban naan, sin marinan maten. Ma sin ba'ne nak, "Karu ho he mu'sosa' Nai' Yesus neu kai, hai of

ambaen ko." Narari te, nai' Yudas anpoi ma in murai naim ranan he nana'at Nai' Yesus neu sin.

Usif Yesus anbukae tuthae Paska nok In atoup-noni' sin

12 Narari te, Nai' Yesus In atoup-noni' sin neman ma nataan Ne mnak, "Aam! Neno ia, neon ko'u Paska. Onaim Ama' Ho roim mi he hai mnao mibarab baer fesat Paska anbi mee?" Neno naan, neno ahunut na'ko neon ko'u atoni' Yahudi. Anbi neno naan, sin biasa ntunun utunu' re' ka mamuur fa, ma sin nroron 'bib-kase msa'. **13** Narari te, Nai' Yesus anreun In atoup-noni' nua mnak, "Hii mnao mihuun nai meu kot naan. Anbi naan of hii miteef mok atoin es re' nasaah oe anbi kuis an es. Hii mnao mituin ee. **14** Ma karu in mnao ntaam neu umi mee te, hii mtaam mituin. Narari te, hii mitonan uim tuaf naan mak, 'Aam! Hai Aam Tungguru ntoit bare he anmoe' fesat Paska nok In atoup-noni' sin.' **15** Te atoni' naan of naruru' ki ke' manuan es, et umi ktuta' fafon. In nkikin narair ke'en naan. Hii nua ki arahaa mibarab bukae anbi naan." **16** Oke te, sin nua sin annaon neu kot naan. Anbi naan, sin nateef nok are' sa'-saa' re' Nai' Yesus natoon nararin sin. Onaim sin nabarab he Nai' Yesus sin nbukaen fesat Paska anbi naan. Narari te, sin nua sin annaon naskau Nai' Yesus nok atoup-noni' bian. **17** Oras mansi nmouf, Nai' Yesus nok In atoup-noni' bo'es am nua annaon neu bare naan. **18** Ntean bare naan, sin ntokon ma nbukae nabubuan. Oras sin nbukaen, Nai' Yesus na'uab am nak, "Hii mneen, oo! Anmui' tuaf es na'ko kii re' of na'sosa' Kau neu atoni' bian sin." **19** Oras sin mneen on nana te, sin neek ein na'uun ein. Ma sin mese'-mese' te nataan Nai' Yesus am nak, "Aam! Re' Ho mteek ee naan, ka au fa, oo?" **20** Nai' Yesus nataah am nak, "Atoni re' narepa' utunu' nok Kau anbi pik-oef ia, in of es na'sosa' Kau. **21** Mimnau, joo! Au, An Mansian re' ia, ro he 'maet, on re' matu'i nrair et Uiseno In Sur Akninu'. Es nana te, mpantom! Atoni' re' na'sosa' Kau naan, of in sutai kun in areu' nii! Reko mneis bait in ain fe kais nahoin se."

Usif Yesus natoon nak utunu' ma tua-min-kase anfain tanar he tamnau Goe

22 Oras sin nbukaen, Nai' Yesus nait naan utunu' fua es, ma antoit makasi neu Uisneno. Narari te, In nteib utunu' naan pisa'-pisa', ma In nfee neu In atoup-noni' sin. Ma In nak, "Utunu' re' ia, Au aok. Mait ma mbukae nai."

23 Narari te, In nait naan kraa-mninit re' matua tua-min-kase. Ma In ntoit makasi neu Uisneno. Oke te, In 'nona' kraas naan neu In atoup-noni' sin, he sin ninun. **24** Ma In nak, "Tua-min-kase ia, Au naak. In of nat'oop he nfee honis neu too mfaun. Naa' re' ia, anfain tanar re' namnaub kit nak, saa' re' Uisneno nba'an naraar je naan, natonon es re' ia. Mait ma miun nai. **25**

Amneen rek-reko! Murai mabe' ia, Au ka neu he 'inu 'teni' fa tua-min-kase ia. Au of 'inu 'tein ee oras Au Ama' abit neno-tunan antook ma naprenat."

26 Narari te, sin sii siit es, he nbo'is Uisneno. Oke te, sin npoin fai naan, ma mnaon on to'ef Saitun.

Usif Yesus natoon nahuun nak nai' Petrus of natoot Ne

27 Oras sin mnaon nabuan, Nai' Yesus natoon nanin sin am nak, "Mabe' ia, hii arki of maen misaitan Kau. Fin matu'i nrair et Sur Akninu' Uisneno nak, 'Uisneno of na'maet atukus, ma in 'bib-kase sin naen ansiksak nok.' **28**

Namneo, Au ro he 'maet. Mes karu Au 'moni' fain jen ate, Au of a'nao uhunun ki on pah Galilea." **29** Narari te, nai' Petrus anraban am nak,

"Aam! Maski sin naen nasaitan Ko, mes au ka neu he aenaf!" **30** Nai' Yesus nataah am nak, "Pe'u! Nati' mumnau! Mabe' ia, nahuun na'ko maun ni nkokre'on hana' nua, ho mutotan Kau era' teun mak, ho ka muhiin Kau fa!" **31** Mes nai' Petrus han ni nsae ma nak, "Kah fa, Aam! Karu Ho mmate te, au 'maet 'ok. Au ka neu he aen usaitan Ko fa, Aam!" Nai' Petrus in aok-bian sin am msa' es-esat na'uab on naan.

Usif Yesus an'onen anbi po'on Getsemani

32 Oke te, Nai' Yesus nok sin annao nkonon ma ntean po'nes et to'ef Saitun, in kan ne 'Getsemani'. Onaim, Nai' Yesus natonan sin am nak,

"Amtook mpao Kau mbi re' ia. Au he 'nao 'onen 'eu re' ne." **33** Ma In anhaman neik nai' Petrus, nai' Yakobos, ma nai' Yohanis, he nnao nabua

nok Ne. Murai na'ko oras naan, In neek ni nsuus ma ka ntainina' fa. **34** In natonan sin am nak, "Au neek ii nsuus anmaet! Au 'naben ate on re' he Au 'maet jen. Hii mtook ma mpao mbi re' ia." **35-36** Narari te, In nao nteni' kre'o, ma anri'tuu ma n'onen am nak, "Ama' amanekat! Karu Ho mromi te, Au kaisa' a'sutai nana' renat tar he 'maet on re' ia. Au 'uhiin 'urair 'ak, ka tiit tan fa saa' re' Ho ka mmoe' man ee fa. Es nana te, karu reko, Ama' mait mu'roba' rais ha'mu'it re' ia na'ko Kau. Mes kaisa' natuin Au romik; so' reko mak natuin Ho romim." **37** Narari te, In nao nfain neu In atoup-noni' teun sin, mes sin ntuup anfinin. Ma In npo' na'fena' sin, ma na'uab neu nai' Petrus, nak, "Hoe! Pe'u! Ho mtuup kum, oo? Au bi nee rabah. Mes he mpao kre'o msa', hi ka mibe'if! **38** Mumeu maat min naan fe'. Narari te, amfeen he mpao mok Kau! Hii neek mini nromin he hi mmoe' rais reko, mes hi aom mini n'oren. Es nana te, reko nneis hii m'onen, henati' karu suu' te neem ate, kaisa' niis kii." **39** Narari te, Nai' Yesus annao n'onen anteni' haef es. In ntoit Uisneno ntein, he Ama' Uisneno nait na'roba' rais ha'mu'it re' naan na'ko Ne. **40** Narari te, In fain neem neu In atoup-noni' teun sin. Mes sin ntuup anfinin, fin sin maat keni nma'fenan re'-re'uf. Onaim In npo' nafena' antein sin. Mes sin ka nahini nten-tein ein fa, he nataah Ee nak saa'. **41** Narari te, Nai' Yesus annao nasaitan sin he n'onen hae' teun ni. Oke te, In fain neem, ma anpo' nafena' antein sin. In nak, "Ai ro hii fe' amtup-tuup fe'e, oo? Noo goah nai! Amfeen! Natuin atoni re' na'sosa' Kau, An Mansian ia, anhaumaken. Oras ia, sin he nheek ma mnona' Kau neu atoin amoe' re'uf sin. **42** Amfeen nai! Mkius nai! Atoni' re' na'sosa' Kau, nemeen. Im he tnao tateef tok sin!"

Anheek Usif Yesus

43 Oras Nai' Yesus fe' na'uab on nana te, nok askeken nai' Yudas nok atoni mfaun neman. Sin neik suin tuka' nok hau tuka', he nheek Nai' Yesus. Sin nmoe' rasi naan, fin sin napenin prenat na'ko a'nakat-a'nakat pirsait Yahudi sin. Sin arsin es re' a'nakat-a'nakat rasi pirsait, tunggur krei sin, ma mnais harat sin. **44** Nai' Yudas natonan nain sin nak, "Mkius rek-reko! Au 'neek sekau te, mheek je nai! In es re' hii mam-maam je ji!" Nai' Yudas anneek

Usif Yesus **45** Onaim, oras nai' Yudas nok sin antean bare naan, in neem anhaek anbi Nai' Yesus matan. Ma in nasee Je mnak, "Aam, Tungguru!" Onaim, nai' Yudas anhoo ma nneek Ee. **46** Onaim, too mfaun sin neman ma nheek Nai' Yesus. **47** Mes Nai' Yesus In atoup-noni' es anfaik in benas, ma ansaip namouf atoin es in rugin noon. Atoin ruik papa' naan, ate na'ko A'nak Ko'u sin A'nakan pirsait Yahudi. **48** Narari te, Nai' Yesus na'uab nok tuaf-tuaf re' he nheek Je naan am nak, "On mee! Hii mak Au re' ia, atoin abururut Kau, oo? Es na' hi iim he mheek Kau meik suni' ma hau tuka'? **49** Neno-neno te, Au 'unoni' kii anbi Uim Onen Uuf Uisneno, mes ka tiit fa tuaf es re' neem he nheek Kau. Im he mheek Kau nai! Natuin rasi naan matu'i nrair na'ko unu' et Sur Akninu' Uisneno." **50** Nai' Yesus In atoup-noni' sin namtau nmaten. Ma fin sin naen nasait Ne nmees. **51** Anbi naan, anmui' atoin es re' fe' na' nanae, annao natuina' Nai' Yesus. In tainuus tai tuuk es. Atoni mfaun sin he nheek je msa', **52** mes sin arahaa nnaa' nanahaa in tais. Onaim in namtau nmaet, es na' in naen af-af'ah.

[Sin neik Usif Yesus annao neu afeek rasi pirsait sin matak](#)

53 Narari te, sin neik Nai' Yesus annao neu A'nak Ko'u pirsait Yahudi sin A'nakan in umi. Anbi naan, kaes ko'u sin nabuan nrarin. Sin arsin es re' a'nakat-a'nakat rasi pirsait, tunggur agama sin, ma mnais harat sin. **54** Oras sin nheek neik Nai' Yesus te, nai' Petrus in nnao natuin nok a'kor-koro', tar antea A'nak Ko'u pirsait Yahudi sin A'nakan in umi. In ntaam anbi umi naan in kintar, ma in ntook nok araar ai sin. **55** Anbi umi naan in nanan, a'nak pirsait sin na'uabin nok afeek rasi pirsait sin. Sin arsin namin bukti he nasaan Nai' Yesus, fin sin he nhukun na'maet Je. Mes sin ka napenin fa bukti sa'-saa'. **56** Ma fin sin no'en saksii namfau, he namouf Nai' Yesus. Mes sin uab keni nasurin es nok es. **57** Oke te, anmui' saksii bian re' anfeen anhaken ma na'uab puta-kriu ma nak, **58** "Hai mneen atoni' ia na'uab am nak, 'Au of 'useer Uim Onen Uuf, re' nafen ee neik 'nimaf mansian. Ma neno tenu nteni' te, Au 'ufena 'ufani' Umi naan, mes ka paek fa nimaf mansian.'" **59** Mes sin uab keni nasurin es nok es. **60** Narari te, A'nak Ko'u pirsait Yahudi sin A'nakat anfeen anhaek, anbi are' afeek rasi sin matak.

Ma in nataan Nai' Yesus am nak, "Too mfaun ni natraak Ko. Mes nansaa' am es Ho mtaa' kum?" **61** Mes Nai' Yesus ka ntoin fa fefa' mese. Onaim A'nak Ko'u pirsait Yahudi sin A'nakan nataan Ee, mnak, "Ho mutoon mita! In amneo ni, Ho re' ia, batur-batuur Kristus, Uisneno In Anah re' In nba'an naan je na'ko un-unu'?" **62** Nai' Yesus nataah am nak, "Namneo! In es re' Au re' ia. Hii arki of miit Kau, An Mansian ni, 'toko' bi neno-tunan, a'bi Uisneno In a'niman a'ne'u. Uisneno anmui' kuasat ma'tani' nneis! Au of 'ok Ne mnaa' aprenat bu'-bua'. Of namuni te, Au saun 'uum 'ok nope u'ko neno-tunan." **63** Anneen Nai' Yesus In uaban nana te, A'nak Ko'u pirsait Yahudi sin A'nakan nato' ko'u, tar antea in npius nakrati' in baru mnanu'. Oke te, in koa' ma natonan are' afeek rasi sin, nak, "Hit kais tami 'teni' saksii!" **64** Hii mneen meik hi rukim kum. In es neik non na'uab on naan, oo? In nait In tuan ni nfain Uisneno in Anah. In na're'uf Uisneno! Natuina' atoran rais pirsait, karu tuaf es nanees on nok Uisneno, in ro he nmaet! Onaim oras ia, hii he mifeek mak saa'?" Onaim sin nafekan ok-oke' nak, "Namneo, atoni' ia nsaan! Es nana te, ro he thukun tiis ne!" **65** Narari te, tuaf fauk neki ntaman ma naroon Nai' Yesus. Sin aum naan In maat kein ni, oke te, sin beso. Onaim sin nataan Ne mnak, "Ho mtakseer miit, sekau es antuuf ko?" Narari te, sin no'en apao Uim Onen Uuf sin, he neem ma neik Nai' Yesus. Oras sin neik Je mnao, sin npaas nafan-fain Ke.

Nai' Petrus natotan hae' teun

66-67 Oras naan, nai' Petrus fe' antook anbi kintar. Narari te, aet-biffee es na'ko A'nak Ko'u pirsait Yahudi sin A'nakan, neem niit nai' Petrus nraar ai. In nano' narek-reko' nai' Petrus in human, ma in na'uab am nak, "Fe'ena, ho mubua mok Nai' Yesus, atoni' Nasaret nana, oo? Tebe, oo?" **68** Mes nai' Petrus nataah am nak, "Kah fa, joo! Nansaa' am es ho mutaan on naan? Au ka 'uhiin Je fa!" Rarit nai' Petrus anpoi ma nhaek anbi eno' kono'. Nateef oras naan, man goe ankokreo'. **69** Narari te, aet-biffee naan niit anteni' nai' Petrus. Ma in natonan atoni mfaun nbi naan nak, "In re' ia, es amsa' na'ko sin." **70** Mes nai' Petrus nraban am nak, nak, "Ho oni' mumaun! Au ka 'uhiin Je fa te!" Ka 'roo fa on nana te, tua' teet es re' anhaek anbi naan nak

anteni' nai' Petrus nak, "Hoe! Ho fe' he mputa-kriu ma mak ho ka mubua mok sin fa! Hoi! Hii arki atoni' Galilea!" **71** Mes nai' Petrus anraban ma'tani' am nak, "Hoe! Au 'suup! Au ka 'uhiin fa atoni' naan!" **72** Nateef oras in na'uab nana te, man goe nkokreo' noo nua. Onaim nai' Petrus namnau naan Nai' Yesus In uaban fe'ena, nak, "Nahuun na'ko maun ni ankokre'on noo nua, mes ho mutotan Kau era' teun." Oras namnau on nana te, nai' Petrus ankae nme'-me'ur.

Sin neik Usif Yesus he nateef nok Gubernur Pilatus

15:1 Neis noi nmeu, afeek rasi sin nnek-mesen he na'maet Nai' Yesus. Onaim sin nfuut neik Je he nateef nok Gubernur Pilatus. **2** Oras sin ntean Gubernur naan, in nataan Nai' Yesus am nak, "On mee? Namneo ho re' ia atoni' Yahudi sin Uisfe es ho, oo?" Nai' Yesus nataah am nak, "Batuur! Ama' Gubernur ho uabam naan, batuur." **3** Narari te, a'nak pirsait sin na'uab ein nok Gubernur naan, nak, "Atoni ia In san ni mfau re'uf!" Ma sin nsoi' In san tein mese'-mese'. **4** Narari te, Gubernur naan nataan anteni' Nai' Yesus nak, "Ho ka mneen fa sin uab kein nana, oo? Sin nasaeb ko rais sanat mfaun. Bait ho mutaah miit fe'!" **5** Mes Nai' Yesus ka ntoen fa fefa' mese', tar antea Gubernur naan nsanmaak.

Gubernur Pilatus anhukun niis Usif Yesus

6 Ton-toon ate, karu atoni' Yahudi sin anmo'en fesat Paska, biasa too mfaun sin anpiir naan atoin hukun es, henati' ama' Gubernur nafeet ne na'ko hukun. **7** Oras naan, anmui' atoin hukun es, in kan ne nai' Barabas. Nahunu te sin heek je natuin in raban ana' aprenat Roma, ma in imsa' anroor atoni'. **8** Natuin fesat Paska naan anpaumaaken, es na' atoni mfaun sin annaon neu Gubernur Pilatus ma nhuun nein am nak, "Ama' Gubernur! Neon ko'u Paska anpaumaaken. Karu reko te, mufetin atoin hukun es on re' ton-toon." **9** Narari te, Gubernur re antoin sin am nak, "On nana te! Au he 'ufetin sekau? Karu au 'ufeti' ki Usif atoni' Yahudi re' ia te, hi mromi', oo?" **10** Ama' Gubernur ee na'uab on naan, maski in nahiin narair nak a'nakat rasi

pirsait sin neik Nai' Yesus neu ne, natuin sin nneek kein nameen anmaten neu Nai' Yesus. **11** Mes are' a'nakat rasi pirsait sin anhuitan too mfaun sin he sin ntoit neu ama' Gubernur am nak, "Hai ka mro-roim man Je fa! Mufetin kai nai' Barabas!" **12** Narari te, ama' Gubernur nataan anteni' sin am nak, "Karu on naan, au he 'moe' saa' neu Nai' Yesus re' sin nteek naan Je nak 'Usif atoni' Yahudi' ia?" **13** Onaim sin huun nein ok-oke' am nak, "Mu'mate He! Mkuus mu'peit Ee anbi hau nehe!" **14** Narari te, ama' Gubernur nataan am nak, "In saan ni saa'? Au 'uprikas 'urair Ii, mes au ka 'upein fa sanat sa'-saa'!" Mes sin arsin anhunun naher-heran nteni' am nak, "Mu'mate He! Mkuus Ee nai anbi hau nehe!" **15** Natuin ama' Gubernur in he nmarinab too mfaun sin nekak, es na' in nafetin nai' Barabas natuin sin romik. Narari te, in naprenat atoin apaot sin he nnao nbeos*Sorarus Roma sin npaek kauboe re' anmoe' je na'ko tain pasu nono' fauk. Narari te, sin futun nui ma'aika' ai' atnoop ma'aika' anbi kauboe je sin pan kein. Karu beos ne fani-fani te, hit paus ki nathoo' nain. Nai' Yesus npaek kauboe. Nbeos naraar Je te, soraur sin neik Nai' Yesus annao he nkuus niis Ne anbi hau nehe.

Sorarus sin nbeos nafan-fani' Usif Yesus

16 Narari te, soraros sin anheer neik Nai' Yesus neu sin koat ee in kintar. Anbi naan, sin no'en nabuab sorarus puk nes, of oni' tuaf natun niim. **17** Ma sin nabaur Nai' Yesus neik baru mnanu' mas mee-umub, on re' usif sin nbiasa npake. Narari te, sin nait noon ma'aika' ma sin nrui' soeb es. Ma sin ntumnii' nataam soeb ma'aika' naan neu Nai' Yesus In a'nakan, sin he na'raur ein on re' he nasaeba' piru'-baru neu uisfe' goes. **18** Narari te, sin na'ruri' na'bees ma nakree' Te, ma sin nak, "Sramat, Aam Usi' Yahudi!" **19** Ma sin na'ruir ein napo-poen anbi Nai' Yesus In matan. Ma sin npuur nein hape fani-fani neu In human. Narari te, sin nte' nafan-fain Ke neik hau. **20** Sin na'kre'et narair Je on nana te, sin npu' nain baru mnanu' naan. Ma sin napakeb nafani' In pake sin. Narari te, sin neik Je npoi na'ko kot Yerusalem, henati' nkuus na'peit Ee anbi hau nehe tar anmaet.

Sin nkuus na'peti' Usif Yesus anbi hau nehe

21 Oras sin npoi mnaon na'ko Yerusalem, sin nateef nok atoin es anbi ran atnana', in fe' neem na'ko kot Kirene. In kan ne nai' Simon. In re' naan, nai' Alexander ma nai' Rufus sin amaf. In fe' he ntaam neu Yerusalem ate, sorarus sin anheer nan ee, ma na'seek ee he nasaah Nai' Yesus In hau nehe.

22 Sin nheer neik Nai' Yesus antea baar jes in kan ne Golgota. In a'moufn ii 'bare 'nak-nuif'. **23** Anbi naan, sin he na'inu' Nai' Yesus neik raur ma'ninu' maseor re'u, hena' In naran menas. Mes In ka nroim fa he niun. **24-25** Narari te, sin nkuus natneneb Nai' Yesus anbi hau nehe. Onaim sin nahake' hau nehe naan, of oni' nreuk seo manas. Narari te, sorarus sin anheran sur ana' he nahinin neu sekau es napein Nai' Yesus In paek ne. **26** Narari te, sin ntuin anbi hau pisa' es, nak: "Atoni' ia, Usif too Yahudi" Oke te, sin nkuus hau pisa' naan, anbi hau nehe neis faof, anhaumaak Nai' Yesus In a'nakan. Sin npaek re' rais matu'i naan he nhuuk Ne. **27** Anbi naan, sin nkuus na'mate msa' aburarut tuaf nua. Es anbi Nai' Yesus In aon bian a'ne'u, ma es antein anbi 'rii. **28** Nok rasi nana te, sin natuin saa' re' matu'i nain anbi Sur Akninu' Uisneno, re' nak, "Sin mo' Je nahuum on re' atoin amoe' re'uf." **29** Are' atoni mfaun re' annao natuin ranan naan, niit Nai' Yesus makfiri' anbi hau nehe. Onaim sin kiu' nein ma nakre'et Nai' Yesus am nak, "Hoe! Ho es re' mak am Ho he mpukai mureo' Uim Onen Uuf Uisneno, rari te mufena' mufain ee anbi neno teun in nanan. **30** Maut he Ho msaun mu'ko hau nehe naan, he mufetin Ho tua man nai! Nok rasi nana te, na' hai mpirsai mak Ho re' ia Uisneno In Anah." **31** Atoni' Yahudi sin a'nakat rasi pirsait nok tunggur-tunggur krei sin nakre'et Nai' Yesus am nak, "In nsoi ma nafetin atoni' bian sin, mes In ka nafetin naan fa In tuan. **32** In nteek In tuan ii nak 'Kristus', atoni' re' Uisneno anba'an nani na'ko un-unu'. Atoni' bian nak, In re' naan too Isra'el sin Usif. Karu namneo on nana te, maut he In saun na'ko hau nehe he hai miit fe'. Hena' hai mpirsai meu Ne." Tuaf nua ein re' na'peti' sin bua'-bua' nok Nai' Yesus anbi sin hau nehe mese'-mese', sin imsa' nakre'et Nai' Yesus.

Usif Yesus anmaet

33 Narari te, meis okan na'aum bare naan, na'ko mansi na'puup, tar antea nreuk teun mansi nmaeb. **34** Oras nreuk tenu te, Nai' Yesus anhunun neik uab Aram am nak, "Eloi! Eloi! Lama sabaktani?" Re' neik hit uabi te nak, "Koi, Au Usi! Koi, Au Uisneno! Nansaa' am es Ho mparakan Kau on re' ia?" **35** Tuaf fauk re' nhaumakan anbi naan, sin mneen Nai' Yesus In hanan. Onaim sin na'uab ein am nak, "Hoe! Hii mneen fe'! In nkoa' na'i nai' Elia, mafefa' kninu' Uisneno un-unu'." **36** Narari te, tuaf es naen nait ani'-tei meto' ma anteep ee anbi raur ma'ninu'. Oke te, napuun ke anbi hau, ma naramib Nai' Yesus he nmuis. Ma atoni' naan nak, "Mpao he hit kius tiit! Kas-kaisa' na'i nai' Elia neem ma nasaun Ee na'ko hau nehe." **37** Narari te, Nai' Yesus anhunun anteni', ma In maet. **38** Anbi Uim Onen Uuf, anmui' naan tai eon ko'u goes, nakfiir ee he nakiin Uisneno In Ke'e Kninu'. Oras Nai' Yesus snasni natfeek, tai eon ko'u naan natpisu' nbait nua na'ko faof tar antea a'piin. **39** Anbi Golgota, atoin a'nak paot es anhake nhaumaak Nai' Yesus In hau nehe. Oras in niit Nai' Yesus In a'maten, in naskeek. Rarit in nak, "Ai joo! Atoni' ia namneo-namneo Uisneno in Anah!" **40-41** Anmui' bifee fauk re' napeen Nai' Yesus In a'maten na'ko 'roo. Sin es re' nahunu te antuthae Nai' Yesus nok In atoup-noni' sin anbi pah Galilea. Sin es re' ain Salome, bi Maria na'ko kuan Makdala, nok ain Maria (re' nai' Yakobos muni' nok nai' Yoses§Tuis uab Yunani bian nak 'nai' Yoses in ainaf', ma bian anteni' nak 'Yosef in ainaf'. sin ainaf), fin bifee mfaun bian anteni' re' neem nabu-buan nok Nai' Yesus neu Yerusalem.

[Sin nataam Usif Yesus In ta'un neu noup fatu](#)

42-43 Narari te, atoin es naim ranan he nasanu' Nai' Yesus In ta'un na'ko hau nehe. Atoni' naan in kan ne, nai' Yusuf. In neem na'ko kot Arimatea. In imsa' tuaf es na'ko pukan afeek rasi pirsait Yahudi. In neek ne reko. In imsa' anpao prenat Uisneno re' he neem. Nai' Yesus In maet nok neon nima'. Noka' te nateef neon onen atoni' Yahudi. Es na' neon nima' naan, nai' Yusuf he nasanu' nahunun Nai' Yesus In aon. Nai' Yusuf naheran in nekan, ma annao ntoit Nai' Yesus In ta'un na'ko Gubernur Pilatus. **44** Oras ama' Gubernur anneen nai' Yusuf in han totis nana te, in nsanmaak. Onaim in

nak, "Ai joo! Atoni' naan anmaet rabah, oo! Anbi au tenbi te, au 'ak oni' ka fe'." Narari te, in nreun tuaf he no'en a'nakat naan, in nataan am nak, "On mee? Nai' Yesus anmate' oo, ai' ka fe'?" **45** A'nak paot naan nataah am nak, "Namneo! In maet et fe'ena, tua." Oras ama' Gubernur anneen on nana te, in fee manuan neu nai' Yusuf he mnao nasanu' Nai' Yesus In aon ta'un. Sin neik Usif Yesus In aon ta'un neu noup fatu **46** Narari te, nai' Yusuf in nao neu Golgota. Ma in nasanut Nai' Yesus In aon na'ko hau nehe. In aum uismina' naan neik tai fe'u re' ma'osa'. Neot naan, sin fe' anpahat narair noup fatu es anbi knet fatu. Narari te, sin nsorot nataam uismina' naan neu noup fatu. Onaim sin naritu' faut-been ko'u es, he na'eek naheran noup fatu naan. Narari te, nai' Yusuf nok atoni' sin anfanin. **47** Oras naan, bi Maria na'ko Makdala, ma ain Maria (nai' Yoses in ainaf), sin nokan amsa' anbi naan. Sin nua sin ankius narek-reko' bare re' sin natunu' Nai' Yesus In aon ta'un.

Usif Yesus anmoni nfain!

16:1 Noka' neon ne'e, atoni' Yahudi sin neon onen. Mansi nmouf narari te, bi Maria na'ko kuan Makdala, ma ain Maria (nai' Yakobos in ainaf), nok ain Salome, sin mnao nsosan min-fubona', he noka' te, sin mnaon nkaik ein neu Nai' Yesus In aon ta'un, natuin harat atoni' Yahudi. **2** Ma noka' snati nsae, sin teun sin annaon neu noup fatu naan. **3-4** Anbi rana tnana' sin na'uab ein am nak, "Amoo! Of sekau es ntitar na'roba' kit faut ko'u naan na'ko noup goe in enon? Hit teun kit ka neu ta'bei' je fa, fin fatu naan ko' re'uf!" Mes oras sin ntean bare naan, sin niit fatu naan natnanib narari. **5** Narari te, sin ntaman nkonon anbi noup fatu naan. Ma nok askeken, sin niit atoin muin fes anpaek muti' nariim, antook anbi sin abnapak a'ne'u. **6** Onaim atoin munif naan natonan sin am nak, "Hoe! Hi kais mimtau! Au 'uhiin 'ak hi iim he maim Nai' Yesus, atoni' Nasaret, re' sin nakmaet narari anbi hau nehe naan. Mes In ka et fa ia. In anmoni nfain! Iim he hi mkius kim bare re' sin natunu' Nai' Yesus In aon ta'un naan. Ka tiit Ee fa heen! **7** Onaim hii mfain nai rab-raab! Amnao mitonan nai' Petrus nok sin am mak, Nai' Yesus anmoni nfain jen. In nao nahunun ki et pah Galilea. Maut he sin nateef nok Nai' Yesus anbiin, on re' nahunu te In natonan narair sin. Onaim

hii mfain nai!" **8** Ma oras bifee naan niit noup ruman naan, sin naskeken. Onaim sin naen anpoin. Sin nfanin rab-raab. Sin npe'on ran ne te, sin ka natonan fa sekau-sekau, natuin sin namtau nmaten.

Usif Yesus nateef nok bi Maria na'ko Makdala

9 Anbi neno Nai' Yesus anfeen anfain naan, In nao nateef nahunun bi Maria na'ko Makdala, re' nahunu te Nai' Yesus anriu' napoitana niut re'uf hiut na'ko na. **10** Oras bi Maria nateef anrair nok Nai' Yesus, in nfain ma natonan atoni namfau re' nahunut sin natuin Nai' Yesus. Sin fe' nabu-buan nok susat makaet, natuin sin namnau Nai' Yesus In a'maten. **11** Rarit bi Maria natonan sin am nak, "Nansaa' am es hii fe' am suus? Kaisa' mnana'reen amteni', natuin Nai' Yesus anmoni nfain jen! Fe'e re' ia, na' au 'uteef 'ok Ne!" Mes sin arsin ntonin am nak, "Hee'e! Ho mupoi!"

Usif Yesus nakriir on anteni' neu tuaf nua

12 Narari te, Nai' Yesus In atoup-noni' nua annaon neu kuan es. Anbin rana tnana' te, Nai' Yesus nakriir on neu sin, mes In na'bani'. Mes ka 'roo fa on nana te, sin nahiin Je. **13** Narari te, sin nua sin anfanin ma natonan sin aok-bian am nak, "Hoe! Hii mneen fe'! Fe'ena hai miteef mok Nai' Yesus anbi ranan!" Mes sin aok-bian sin antonin am nak, "Heero! Hii kaisa' mipoi on naan!"

Usif Yesus nakriir on neu In atoup-noni' sin ok-oke'

14 Narari te, Nai' Yesus nateef nok In atoup-noni' bo'es am mese. Oras naan, sin ntokon ma nbukaen. In nak sin am nak, "Hoe! Hii 'nak-faut mein ii! Atoni' natoon anrair ki ma nak sin niit narair Kau neik sin matak, mes hii ka mpirsai fa joo! Hii mak, sin arsin napoin! Naa! Oras ia, Au 'eik nok 'uum. Namneo Au 'maet, mes oras ia, Au 'moni 'fain! Naa! Hii miit meik hi matam. **15** Es nana te, oras ia hii ro he mnao amfuun ma miteef pah-pinan ia, he mitonan too mfaun ok-oke' Au Rais Reko ia. **16** Sekau re' anpirsai neu Kau, ma nasrain, of Uisneno anfee ne 'honis, he in natua nabar-baar

nok Uisneno anbi neno-tunan. Mes sekau re' ka npirsai fa, of in napein hukun, ma fin Uisneno nriu' napoi ne ma natua nabaar anbi mone'. **17** Ma atoni' re' anpirsai neu Kau, of sin mo'en rais sanmakat huma'-huma', henati' atoni mfaun sin nahinin nak sin kuasat naan neem na'ko Uisneno. Es na' nabei', sin nriu' niut re'uf sin neik Au kanak. Of Uisneno nmoe' sin he sin na'uaban neik uab bian re' sin ka nahiin je fa. **18** Onaim, karu sin mnaa' kaun re'uf, ai' sin niun naan raso, sin ka neu he nsirakok fa. Karu sin npohon amenat, of amenat naan nareok."

Usif Yesus na'ait on neu sonaf neno-tunan

19 Ma oras In na'uab narair nok In atoup-noni' sin ate, Uisneno na'aiti' nasaeba' Nai' Yesus neu neno-tunan. Anbi bare naan, In nfain on Uisneno An Pirsai'i, he nua sin ntokon ma naprenat nabu-buan. **20** Narari te, In atoup-noni' sin annao natuin In a'prenat. Sin mnaon neu bare-bare ma natonan too mfaun antoom Nai' Yesus In Rais Reko. Onaim Uisneno anfee kuasat neu sin, henati' sin nmoe' rais sanmakat namfau re' Nai' Yesus natoon nararin sin. Ma too namfau anpirsai neu Ne, natuin sin nahinin nak Rais Reko naan ro namneo.